

58

भार-कर प्रकाश

ओमकार आधार


स्वामी आफ़ताब जी

औतार कृष्ण राजदान
A.K. Razdan



परमपुज्य स्वामी आफ़ताब जी महाराज
कारिहामा-कुपवारा, कश्मीर

3 अगस्त 1883 ई० - 28 जनवरी 1960 ई०




आश्रम किस आंगनस मंज अख ल्वकुट पाँ ज्वय।



परमपुज्य स्वामी आफ़ताब जी महाराज 'भास्कर'



आश्रमस मंज अख भ्रन कुल,
युस काँशरिस मंज गणेश सुंद अख प्रत्यक्ष छु माननु यिवान।



आश्रमुक अख ल्वकुट मंदर, यथ स्वामी जियन छु
पनुन्यव अथव कुन दियुतमुत।



आश्रमस मंजु अख चूक्य,
यथ प्यठ स्वामी जी अकसर बेहान आँस्य।



स्वामी जीनिस आसनस ब्रोंहकनि श्री हरी कृष्ण कौल
तु श्री सुरन्दर जी हाँजरी त्रावान।



स्वामी जीयुन आसन तु चर्ण पाधुका।



स्वामी जीयिन आसनस ब्रोंहकनि जु कॉशिर सितार,
यिम स्वामी जी पानु वायान ऑस्य।



स्वामी जीनिस चर्ण पाधुका।

भार-कर प्रकाश

उभूग प्रकाम
मुभीमुळउरणी

ठिकर रुप धापन

सम्पादक

स्वामी आफ़ताब जी

कारिहामा कुपवारा, कश्मीर

भास्कर प्रकाश

(येमि किताबि हुंद् कुलहुम होकू छि छापन वॉल्य सुंदि नाव मोहफूज़)

किताबि हुंद् नाव	:	भास्कर प्रकाश
लेखन बोल	:	स्वामी आफ़ताब जी
छापन सन	:	2010 ई.
कम्प्यूटर डी.टी.पी	:	रिंकू कौल (फोन 94191-36369) आई आई एल एस डी.टी.पी सेन्टर, मुठी ज़ोमा
म्वल	:	ज़ु हथ र्वपयि सिर्फ़ (Rs.200/-)
पब्लिशर	:	पंडित हरी कृष्ण कौल सपुत्र स्व. पं. काशी नाथ कौल शिव पोरा, राम मुनशी बाग, श्रीनगर, कश्मीर।
मूल निवासां	:	बाग, जोगी लंकर, रैणावारी, श्रीनगर, कश्मीर।
छाप खानु	:	जे.के. प्रिन्टर्स, जामा मस्जिद दिल्ली-110 006 Ph: 23379852

किताब मेलनुक पत:

1. SAYCON-CHEMISTS
Shop No. 65, Main Market, Jain Nagar-Delhi-110 081
Mob.: 9136686316 Ph: 011-24506701
2. 354/1 Sector, 45 A, Chandigarh, Ph: 0172-2665244
- 3.

विश्य सूचि

प्राक्कथन	:	हरीकृष्ण कौल	1
निवेदन	:	हरीकृष्ण कौल	3

1.	गुरुस्तुति:	5
2.	ग्वडुन्य तस आदि दीवस कर नमसकार	6
3.	ओमकारु आधारु हे उमा पुत्र	7
4.	आदि दीव कारनु व्यौदी निवारो	9
5.	अन्धकारुक्य इन्दु शिव शांत सतग्वरु	10
6.	ह्यसुके आगरु मसके सागरु	12
7.	शामु कामकि सुंदर शामु रामु नेशकामु श्रीधरय	13
8.	योगिन्दर गौरी शंकर गिरिधर	14
9.	चँदरु चुडु शेखर सुन्दर गंगाधर	16
10.	अर्धुनारी श्वरु गौरी शंकरु	17
11.	दयि म्यानि अक्षय हे मृत्यञ्जय	19
12.	वंदी मैं तेरे चरणों नन्दीश ईश सरदार	20
13.	योगु धारणायि प्राण संदोरुम	21
14.	हे नाथु अनाथनय दया कर	22
15.	पोत जूने मौत वज्रनोवुम	23
16.	परिपूर्ण नूरु बोरमुतये	25
17.	भक्ति भावनायि म्वखतु ब्योल ज़ावो	28
18.	नालुमति रटुहथ गंडय त्रैट्य तु मालु	30
19.	राधा कृष्ण बोल लोल छु आमुतये	34

20.	ख्वनि मंज ललुवथ ईशवेशधरो	35
21.	शीष शायनु ईश नोन द्रावो	38
22.	शामु रूपय हा डाम्बलो	40
23.	रटहथ बु नालय चु सालु यिखना	41
24.	वैन्य दिमहोस बिन्द्राबनसय	42
25.	फवलुवुनि सोंतय छुय म्योन सालो	44
26.	गोपी नाथु भक्ति रखिपालो	46
27.	शामु रुप वलो आम लोलुये	47
28.	द्रायि राधा ह्यथ गूरय बाये	49
29.	उदव लोलु नारु दैज सॉन्य तन	51
30.	ओम परवुन हंमसु ताजदार	52
31.	गो वर्दनु गिरिधर	53
32.	त्वलि ललुवथ थावथ सुलुनॉविथ	54
33.	गछतु बॉबरु वुछतु बे रंग	55
34.	बहार आव कोनु आव दिलदार इम शब	56
35.	सुर्दशन च़खर ह्यथ नोन नेर	58
36.	रटहथ बु नालु व्वलु सोन सालु कृष्णा	59
37.	गंडय त्रेट तु मालु अज सोन सालु यिखना	60
38.	कुनि यिखना यावन च़ूरय लो लो	61
39.	मधुसूदन शवदु द्वदु च़ूरय लो लो	62
40.	वनतु पोशु नूल ओश यीनाये	63
41.	यनु छयनु गोख तनु छसयो बु थारन	64
42.	पथ वनु कोर विगिन्यव रोव	66
43.	रोशु रोशु ओश म्योन यूरय अनतन	67
44.	कसवनु ज़ीरु बम सीर ओसमय	69
45.	ग्यान दिम पान हाव रटतो नालो	72

46.	व्वंदु यंदु रव मन फवलुनॉविथ	73
47.	ओश छुम सुत्य सतिये	74
48.	रुमु रुमु श्यामाकार	76
49.	व्यकुन्ठ द्वार बिन्द्राबन तु लो लो	78
50.	नंदुनंदन गोमय बिंद्राबन गिंदोने	80
51.	शामु स्वंदर दर्शुन दियिना	82
52.	द्वह दरि गोम तूरय पतु लारय	86
53.	च्यथ विकासु रासु अथुवासु प्रेम वादु	87
54.	दर्शुन दियि थियि नाये	89
55.	म्वनि मंज ललुवथ वॅन्या लालो	90
56.	गूपालु गूकलो	92
57.	वेरि तॅम्य सुंजि शेरि प्रान संदोरुम	93
58.	अरे कनैया तू वसतुर दे हमारे	94
59.	स्वरु सामु सुबह शामु शामु रूपु सुय	95
60.	अष्टु ब्वजु नारायनु कष्टु कर सॉ दूर	97
61.	परात्पर परमु शिवी	99
62.	बाह रव गाह चोन माह पैक्करिये	101
63.	जगथ बीजु चॅकुर शूडश डल	103
64.	जगत बीजु तीजु परि पूरन	105
65.	श्री राज्ञन्या ख्यमाकार	106
66.	ललुवान सीरि हक जेरि जेरि हेरि ब्वन	108

प्राक्कथन

कश्मीर अपने प्राकृतिक दृश्यों जलवायु तथा निजी स्थानीय विशेषताओं के कारण भूस्वर्ग की पदवी पर आसीन है। इतना ही नहीं अपितु इस पुण्य भूमि ने अच्छे अच्छे सूफियों, सिद्ध दार्शनिकों अद्वितीय विद्वानों, उच्चकोटि के कवियों तथा प्रतिभाशाली आचार्यों को जन्म दिया है।



हरीकृष्ण कौल

क्योंकि संसार नाशशील है अतः जिन महापुरुषों के चरित्र आज तक लिपिबद्ध किये गये हैं उनका जीता जागता चित्र हमारी आँखों के सामने इस समय भी फिर रहा है। उनकी मधुरवाणी से हम आज भी उसी प्रकार आप्लावित हो रहे हैं जिस प्रकार उनके सम-सामयिक आनन्द की मस्ती से झूम उठते थे।

यहाँ पर उन आदरणीय महानुभावों में से मैं विशेषतया एक का वर्णन कर रहा हूँ। आप का शुभ नाम उत्तम स्वरूप स्वामी आफ़ताब जी है। आप का जन्म 12 भाद्रपद 1939 वि० तदनुसार 3 अगस्त 1883 ई० शनिवार को 2 बजे 20 मि० कारिहामा में हुआ तथा आप का शिवलोक-गमन 5 माघ 2016 वि० तदनुसार 28

जनवरी 1960 ई० 9 बजे 55 मि० सोमवार को हुआ। शैशव काल से ही आप में ऐसे लक्षण प्रतीत होते थे जिन से आपके अन्तर विद्यमान किसी आध्यात्मिक शक्ति का भास होता था। आप के गुरुवर ने इन्हीं कारणों से एवं आपके सहजज्ञाण के कारण ही आपको भास्कर के नाम से पुकारना उचित समझा चूंकि भास्कर (सूर्य) के प्रकाश से समस्त जंगत का अन्धकार क्षणों में मिट जाता है। अतः उक्त महानुभाव की रचना संग्रह का नाम भी मैं ने भास्कर प्रकाश रखना ही उचित समझा। अपनी ओर से मैंने आपके काव्यामृत को क्रमबद्ध करने का पूर्ण प्रयत्न किया। आशा है कि सहृदय जन आपके काव्य में अद्वैतवाद, अखण्ड ब्रह्मवाद, काव्य सूक्तियों के वैचित्र्य चमत्कार को उत्पन्न करने वाली उपमाओं एवं अन्य अलंकारों के स्वाभाविक प्रयोग का स्वयं ही अनुभव करेंगे और अवश्य ही उनसे प्रभावित भी होंगे।

हरीकृष्ण कौल

निवेदन

‘भास्कर प्रकाश’ शीर्षक से स्वामी आफ़ताब जी की ये महत्त्वपूर्ण कविताएं आपके हाथों में हैं। हमारे लिए ये स्वामी जी की अमूल्य निधि है जिसे सहेज कर रखने और उससे लाभान्वित होने की अत्यंत ज़रूरत है। विशेषकर ऐसे समय में जब हम कश्मीरी पंडित एक समुदाय के तौर पर विनाशकारी धार्मिक आतंकवाद, जीनोसाइड और जबरिया विस्थापन के दिनों से गुज़र रहे हैं। हमारी आने वाली पीढ़ियों के लिए हम मात्र इतिहास न बन जाएं, हम अपनी जड़ों, अपनी संस्कृति, भाषा, परंपरा, तीज-त्योहार, साहित्य, दर्शन और संतों, कवियों से अनजान होकर अतीत से विहीन न हो जाएं। ऐसे में स्वामी आफ़ताब जी जैसे भक्त- शिरोमणि की जीवन-गाथा, उनकी तपस्या, उनका सन्देश, उनका लीला-काव्य सहेजकर रखने और उससे स्वयं को तथा हमारे संसार भर में बिखरे बच्चों को लाभान्वित होने की अत्यंत ज़रूरत है।

स्वामी आफ़ताब जी ‘भास्कर’ की ये लीला-कविताएं दिव्य ज्योति के बीजाक्षर पहली बार सन् 1959 में उर्दू लिपि में प्रकाशित हुई थीं और उस संग्रह की पांच सौ प्रतियां हाथों हाथ स्वामीजी के भक्तों तक पहुँची थीं तो स्वामी जी ने इन रचनाओं को देवनागरी

लिपि में प्रकाशित करवाने की इच्छा प्रकट की थी। उनकी इच्छा का पालन करते हुए मैंने सन् 1968 में इन कविताओं के संग्रह की एक हजार प्रतियां देवनागरी लिपि में छपवाई थीं। प्रथम बार भट्टार, श्रीनगर, निवासी स्वर्गीय वेदलाल धर ने इन कविताओं का हिन्दी लिप्यंतरण कर मेरी सहायता की थी, जिस के लिए मैं उनका हृदय से आभारी हूँ।

मैंने प्रयास किया है कि इस संस्करण में वे सारी अशुद्धियाँ न रहें जो पिछले संस्करण में रह गई थीं। मैं विलंब के लिए स्वामी जी के भक्तों से क्षमा याचना करता हूँ।

पिछले संस्करण में रही त्रुटियों को दूर करने तथा नया कश्मीरी लिप्यंतरण कर इस बार मेरे सपुत्र श्री रोशन लाल कौल ने मेरी सहायता की, जिस के लिए मैं उनको आशीर्वाद देता हूँ।

पुस्तक के प्रारम्भ में स. पं. पीताम्बर हंडू (शास्त्री) की संस्कृत रचित स्वामीजी की हुयी 'गरुस्तुतिः' छपाई है।

मुझे आशा है स्वामी आफताब जी 'भास्कर' की ये भक्ति रस-विभोर रचनाएं पाठकों को अध्यात्मिक आनन्द देंगी और हमें सद्मार्ग पर निरंतर चलने और चलते रहने में प्रेरित ही नहीं प्रोत्साहित करती रहेंगी।

भक्त कवियों के काव्य में मंत्रों का ओज होता है, सिद्धि होती है।

॥ अस्तु ॥

हरीकृष्ण कौल

गुरुस्तुतिः

आप्ताभमाप्तेश्वरज्ञान शेषवि माप्ताभज्ञानासिनिष्ठतपडिपुम् ।
 आप्ताभसच्छात्र विवेकसन्मति मादित्यभाभासितकाय मीडे १
 ब्रह्मानुसंधान निरस्तमायं ब्रह्मविभाधूत स्वशिष्य ध्वान्तम् ।
 ब्रह्मैक्यसंछिन्न विकर्मग्रन्थि श्रीभास्करंभास्कर भासमीडे
 गोविन्दजीवासुशक्तिपातं गोविन्दविज्ञानविचार हंसम् ।
 गोविन्दभक्तपिंकृतसुसंगमं श्रीभास्करं ००० ॥ ३ ॥
 तत्त्वंपदार्थैक्यविवेचन परं तत्त्वं पदार्थैक्यसुनिश्चयान्वितम्
 तत्त्वंपदार्थैक्यनिरस्तद्वैतं श्रीभास्करं ००० ॥ ४ ॥
 कुमारग्रामस्थजनान्धकारहं कुमारसंमर्दन संयमायुधम् ।
 कुमारतातेक्षणप्राप्त सद्गतिं श्रीभास्करं ००० ॥ ५ ॥
 तोभाख्यताताप्तसुजन्मस्वर्गं स्वशिष्यहृद् द्वापर भेदनक्षमम्

स्ववाक्यभाभासित लोकसत्यथं श्रीभास्करं ० ॥ ६ ॥
 दीक्षावसुदान निरस्तनैःस्वं दीक्षामणि द्योतित भक्ति मार्गम्
 दीक्षासिसंच्छिन्नप्रपंचजालंदीक्षाप्रदं श्रीगुरुवर्यमीडे ॥ ७ ॥
 श्रीपार्वती कुक्षिवनीद्धवसुमं श्रीपार्वतीस्तोत्रसुपूतमानसम्
 श्रीपार्वतीनन्दनदत्तवैभवं श्रीभास्करं ००० ॥ ८ ॥
 पीताम्बर प्रेरणया कृतस्तवं पीताम्बरेण विबुधाग्रिसेविना ।
 पीताम्बरासक्तधियं सुमेधसं श्रीभास्करं ००० ॥ ९ ॥
 समर्थित्वचरणारविन्दयोः श्रद्धाजलि भावप्रसून गुम्फितम् ।
 गृह्णन्तुमातेवस्वपुत्रभाषितं दयालवोभास्कर दैशिका बुधाः ॥ १० ॥

श्रीगुरोर्दशकमेतद्यः पठेत्सततं बुधः

आप्तुयान्मानसंकाम श्रीगुरोः कृपयातुसः

ग्वडुन्य तस आदि दीवस कर नमस्कार

ग्वडुन्य तस आदि दीवस कर नमस्कार ।

व्यनायक सेदि दाता व्यंगु हरतार ।।

छु गनपत सारिकुय सरताज वोनमुत ।

छु गनपत सारिकुय महाराज वोनमुत ।।

छि कर्मन सारिनय पूजा तसुंज आद ।

छि धर्मन सारिनय व्योदी करान बाद ।।

कॅरिथ आरंभ स्वरन यिम नेत्य तसुंद नाव ।

गछ्यख स्यद कामना व्यगुनक छु अबाव ।।

सु प्रेयिवर दयि सुंद गज्जम्बख तरनतार ।

यछा संतान सॅती हुन्द छु म्बखतार ।।

सु सरदार दीवनय हुंद सरकार मानुन ।

बु दरबार तस छु सतकार पार्यज्ञानुन ।।

व्यनायक छु सुनायक नेत्य सहायक ।

सु वरदायक त्वता करनस लायक ।।

सॅतीसत माजि हंदि पासु कर मे दासस ।

कॅरिथ वास आस बास व्यसुवन व्यकासस ।।

चतुर दल द्वार मूलादारकुय ध्यान ।

त्रापुर व्वलँगिथ छु चूरिम तीत रोज्ञान ।।

तवय ननि नोन 'भास्कर' पॉन्य पानु व्वलसान ।

नेत्य आनन्दमय निरद्वन्द शूबान ।।

ओमकारु आधारु हे उमा पुत्र

ओमकारु आधारु हे उमा पुत्र ।
हे लम्बूदरु दुरु चोनुय ध्यान ॥

प्रेयमु स्वरु स्वरहथ हे विद्याधरु,
गजम्बख सनम्बख दर्शुन मे हाव ।
हरु म्बखु स्वरु म्बखु वनि यितु मनुसरु ॥
हे लम्बूदरु दुरु चोनुय ध्यान ॥० ॥

मूला दारु लोल आम योगेन्दुरु,
चौतुरदलु व्वलसिथ विराजमान ।
प्रानु अपानु अर्गु बर्गु पूज चॉन्य करु ॥
हे लम्बूदरु दुरु चोनुय ध्यान ॥० ॥

नायक व्यनायक छुख सहायक ग्वरु,
चौतुर व्वज्ज चोर आयुध चमकान ।
धर्मु अर्थु कामु कामकि मूखि दातरु ॥
हे लम्बूदरु दुरु चोनुय ध्यान ॥० ॥

उमानन्दन क्षमा सागरु,
रुमु रुमु रुमन छम चॉनी कल ।
रुमा रूज्जिथ बोज्जतम ऑरचरु ॥
हे लम्बूदरु दुरु चोनुय ध्यान ॥० ॥

येगनि बखि विघ्न हारु गगनु पीतांबर,

मगनु आनन्द सुंदि व्वंदुहय पान ।

च्यथ विमर्श दिपतिमानु कूटि सिरियि चंद्र ॥

हे लम्बूदरु दरु चोनुय ध्यान ॥०॥

भक्ति रक्षि शक्ति प्रेयि हे वलुबादरु,

मूक्ष दातु रक्त वर्नु छुख चु त्रिनयन ।

प्वखतु कारु म्वखतारु मुक्तु बनि म्वखतुसर ॥

हे लम्बूदरु दरु चोनुय ध्यान ॥०॥

ईकु दंतु वकरु तुंडु हे सेदि दातरु,

दीर्घमोर मुकटु शूबायि मान ।

मूशकु वाहन योनि नागेंद्र ॥

हे लम्बूदरु दरु चोनुय ध्यान ॥०॥

लालु मालु नॉल्य छय हे बालु चंद्र,

मालु करहय यित् साल छुय सोन ।

शिव नाथु सुंदि टाठि हे इच्छा पुत्तर ॥

हे लम्बूदरु दरु चोनुय ध्यान ॥०॥

आदि दीवु व्याध कास बास नेबॅरु अंदरु,

सत सॅती माजि हुंदि पासु कर मे पास ।

मनु निवासु आस भास नोन 'भास्करु' ॥

हे लम्बूदरु दरु चोनुय ध्यान ॥०॥



आदि दीव कारनु व्यौदी निवारो

आदि दीव कारनु व्यौदी निवारो ।

सेदि दातारो बैव्य नय जय ॥

ईकु दन्तु वकरु तुण्डु सर्व आदिकारो,

गजु म्बख्दारो अजु अभय ।

उमा नन्दनु गनु सरदारो ॥

सेदि दातारो बैव्य नय जय ॥० ॥

चोतुर दलु बलवीरु मूलादारो,

न्यथ पँहरुदारो ह्यथ वर अभय ।

असतरु शसतरु ज़ोरावारो ॥

सेदि दातारो बैव्य नय जय ॥० ॥

मंत्र नायक सहायक उदारो,

कर परमु पारो व्यनायक स्यदय ।

हे वरदायकु बडि सरकारो ॥

सेदि दातारो बैव्य नय जय ॥० ॥

कृष्णु प्यंगलु धूमरु वर्णु शेशि शीखारो,

नागेन्द्रधारो छुख परमु परय ।

बालु चँद्रु लालु मालु नॉल्य म्बख्तुहारो ॥

सेदि दातारो बैव्य नय जय ॥० ॥

विकटु वर्णु सिरियि चन्द्रमु तारो,

त्रिन्यथरु धारो स्वर्णमय ।

व्यगनु राजु यज्ञनि दीवु गगनु आधारो ॥

सेदि दातारो बैव्य नय जय ॥० ॥

माजि हुंदि राजु जादु हा ताजदारो,

ईशरु प्यारो हे गणेश्वरय ।

रक्तु र्वनु शक्ति प्रेयि भखत्यन सहारो ॥

सेदि दातारो बैव्य नय जय ॥० ॥

पास कर बास नोन कास अन्धकारो,

कर ह्यत्कारो दासन जय ।

सास 'भास्कर' छुय त्वता कारो ॥

सेदि दातारो बैव्य नय जय ॥० ॥



अन्धकारुव्य इन्दु शिव शांत सतग्वरु

अन्धकारुकि इन्दु शिव शांत सतग्वरु ।

परापर परमुदामु रामु रामु परयो ॥

आदिदीवु गोविंदु नादु ब्यंदु अक्षरु ।

न्यर दुन्दु नेशकामु रामु रामु परयो ॥

दयि अद्वय दयि दयायि किन्य चाव ।

प्रेमु मसुकी जामु रामु रामु परयो ॥


तमि मसु रसु रसु लगहय नावस ।

हावसु सुब शामु रामु रामु परयो ॥



परमपुज्य स्वामी आफ़ताब जी महाराज
कारिहामा-कुपवारा, कश्मीर

3 अगस्त 1883 ई० - 28 जनवरी 1960 ई०



इन्दु रवु व्वंदि बास अज्ञानु गटु कास ।

बास मंज ख़ासु आमु रामु रामु परयो ॥

शामु रगुँ बोम्बरो गुं गुं चानि सुत्य ।

ही तनि च़जि मा हामु रामु रामु परयो ॥

अनुग्रेह पूर कर संकट मै दूर कर ।

च़लनम लूकु पामु रामु रामु परयो ॥

शक्ति पातु सुत्यन मुक्ति दातु सौन्य खेत ।

पपनाव हचि तु हामु रामु रामु परयो ॥

मुरली वायिवुनि अनुहत बाजि बोज ।

दर्द सोज़ु स्वरु सामु रामु रामु परयो ॥

ऑम्य ज़ॉम्य द्वद प्यालु बरँय बरँय बु थावय ।

चखना दामु दामु रामु रामु परयो ॥

सोदाम दामु चाव सहस्र दल प्रावुनाव ।

भक्ति हुंदि प्रानायामु रामु रामु परयो ॥

कर गँडिथ बरुतल छुस बु दिम वरदान ।

धर्म अर्थ मोक्ष कामु रामु रामु परयो ॥

अज्ञानु गटु कास 'भास्कर' नोन बास ।

अज़पा प्रानायामु रामु रामु परयो ॥



ह्यसुके आगरु मसके सागरु

ह्यसुके आगरु मसके सागरु ।

हे सत ग्वरु रसु रसु मस मै चाव ॥

ह्यसुकुय ह्यस दिम मसकुय मस दिम ।

मसतानु तमि मसु ह्यसु व्यसराव ॥

अँदरिमि तौंदर्य प्रान तावु नॉविथ ।

चँदरमु मंडलु अमर्यत चाव ॥

दमु दमु ओमकुय पन खारुनॉविथ ।

यँदराज़स मै नँदरि वुज़नाव ॥

हमसु द्वार मान सरु वारु फ्वलुनॉविथ ।

सहस्त्र दलु डलु योग गथ प्रावनाव ॥

कन्दापोरय शशि तु रव सॉविथ ।

शिव गाश कीशव शिव वुछनाव ॥

नव्वुय दारन दाह मिलनॉविथ ।

द्वादशांत मंडल काह मुछनाव ॥

गगनस हेरि शेरि प्राण फेरुनॉविथ ।

ज़ीरु बमु सीर नादु ब्यंद वुज़नाव ॥

शाह परवुय सुत्य पान वुफनॉविथ ।

छेपि छारि सू हम पान प्रज़नाव ॥

ज्योती विभूती नँन्य प्रावुनॉविथ ।

आप्त कामु प्रापत मैति करुनाव ॥

आकाश पातालु छाल फेरनॉविथ ।

जेरि जेरि हैरि ब्वन ईक बनाव ॥

दिक पाल नव ग्रेह दास बाव प्रॉविथ ।

सास 'भास्कर' ननि नोन बासनाव ॥



शामु कामकि सुंदर शामु रामु नेशकामु श्रीधरय

शामु कामकि सुंदर शामु रामु नेशकामु श्रीधरय ।

करुनाकर दुरिताहर वरदायकु सत् ग्वरय ॥

नन्द नन्दन बन्दन कासतम तु न्यरबन्दनु निर्भरय ।

नरु वासनु गरुडासनु शेषशायन ईशरय ॥

दीशु व्यापक हे विशमबरु वरदायकु सत् ग्वरय ।

भक्त रक्ष हे शक्तीश्वरु मुक्त मुक्त कर म्वख्तुसरय ॥

हे प्वख्तुकारु पॉरहय जेय म्वख्तुहार भख्त्यन तार भवसरय ।

चानि बरुतल त्रॉविथ छुस बु लर वरदायक सत् ग्वरय ॥

आदि अंति रोस्ति नादु ब्यंद ओमकारु इन्दरव सुंदि सुन्दरय ।

दिह मंदिरु पूजुहथ भोगिंदरु योगिंदरु ब्रमु रंदरय ॥

दशमु द्वार तरु द्वादशान्त अंतरु वरदायक सत् ग्वरय ।

दीव ब्रह्मा गंदरुव कारन ध्यान दारनायि तत्परय ॥

सूर्य चंद्रमु आकाश तारा अनुशासनु प्रकरय ।

दयि भयि चोन मॉनिथ सुरासुर वरदायक सत् ग्वरय ॥

गथ चॉन्य नेत्य अपारंगिथ दजुवन्य तति शहपरय ।
 बल वीर ईरु धैर छुनु वीरन सीर कुस वनि नेबरय ॥
 रेण्य केशान डेंशिहोन आश्चर्य वरदायक सतग्वरय ।
 दुरु क्या ध्यान मनुकुय अगोचरु वनि वॉनी स्व बनि व्यसमरय ॥
 ह्यस तु होश ब्वज तौर कोर पोशान वुछिहन बाहि नेत्रय ।
 ज्ञानु दृष्टि दिम पानु चुय हरेहर वरदायक सत् ग्वरय ॥
 नैशकारण चुय सर्वकारण त्रैयि कारनु अन्तरय ।
 दशि अवतार दॉरिथ चुय हिशु रॅस्ति निशु बास न्यबरु अंदरय ॥
 'सास भास्कर' भासुवुन छु भास्वरु वरदायक सत् ग्वरय ॥० ॥



योगिन्दर गौरी शंकर गिरिधर

योगिन्दर गौरी शंकर गिरिधर ।
 श्री सत्ग्वरु हरु बॅव्यनय जय ॥
 चान्यन चरनन हुंदुय छु आसरु,
 व्याध कास अन्तःकरनन भास ।
 शरनागतु वतसलु परमीश्वरु ॥
 श्री सत्ग्वरु हर बॅव्यनय जय ॥० ॥
 सुथूलु सूखिमु कारण साँन्य नेबरु अंदरु,
 चराचर बावु किन्य छुख चु पूरन ।
 चरचन तु अर्चन चुय छुख परातपरु हर ॥
 श्री सत्ग्वरु हर बॅव्यनय जय ॥० ॥

अवेद्या गालुवुन छुख चु विद्यादर,
 सेदि दातरु ग्वरु चुय सर्व शक्तिमान ।
 प्राणु अपानु अर्गु बर्गु पूज चॉन्य करु ॥
 श्री सत्गवर हर बैव्यनय जय ॥०॥

चँदर चूड नागेन्द्र हारु गिरजा दरु,
 त्रिनेत्र धारु वनि वृषभवाहन ।
 जटा मुकट् ह्यथ शेशिशेखर ॥
 श्री सत्गवर हर बैव्यनय जय ॥०॥

उरुदुरुतु भसमाधरु शीत स्वंदरु,
 शँख शूल पदमु हस्त वरदुअभय ।
 गज चम हेरम्भ वसतुर देगमंबर ॥
 श्री सत्गवर हर बैव्यनय जय ॥०॥

कारन तु दीवगन त्वतनस त्रे अक्षरु,
 धारवुन्य स्यद नेत्य चोनुय ध्यान ।
 तारुवुन करुनावि तार भव सागरु ॥
 श्री सत्गवर हर बैव्यनय जय ॥०॥

गटि मंज प्रजलान छुख चु 'सास भास्करु',
 आश तोश छठ छाय कास बास नोन ।
 धर्म अर्थ काम दायकु मोक्ष दातर ॥
 श्री सत्गवर हर बैव्यनय जय ॥०॥



चँदरु चूडु शेखर सुन्दर गंगाधर

चँदरु चूडु शेखर सुन्दर गंगाधर ।
शंकर सु सर्वशक्तिमान वरि मे ॥

आशतोश नाशु रस्ति शांत वीदु सागुर,
ब्रँत्य ब्रम कासुवुन त्रि जगत नाथ ।
कैलासु वास ईकांत गिरि जाधर ॥
शंकर सु सर्वशक्तिमान वरि मे ॥०॥

सूर नूर बँरयथय सुय परात परु हरु,
शक्ति पातु बँखत्यन करान अनुग्रेह ।
त्रिनयन मनुनु शीलू ननि नोन दिगम्बरु ॥
शंकर सु सर्वशक्तिमान वरि मे ॥०॥

शिवु गाश प्रवु रवु त्राव अँदरु न्यबर,
नवि नौव नवदार तरु बहिम द्वार ।
दशमु द्वारु तारु दियि द्वादशांत अंतर ॥
शंकर सु सर्वशक्तिमान वरि मे ॥०॥

ओम भूर भुवः योगीश्वरु सु ग्वरु वरु,
आप्त कामु व्यापक सु शिव निर्वाण ।
अष्टु सैदि दातरु येष्ट दीव दुष्टु हरु ॥
शंकर सु सर्वशक्तिमान वरि मे ॥०॥

प्राण अपान अर्गु भर्गु पूज तस कर,
गोड मानसरु दीप दजि अहंकार ।
ज्योति विभूति हरम्बु ब्रमसरु ॥
शंकर सु सर्वशक्तिमान वरि मे ॥० ॥

सतु रेश्य तु कारन स्यद बेयि गंदर्व,
शशि तु रव नेशिदिन दुरुवन्य छि दान ।
ऋद्धि तु सिद्धि दिवान सु सेदिदातु ॥
शंकर सु सर्वशक्तिमान वरि मे ॥० ॥

ऑदीन तॅम्य सुय यि समसार चकर,
तॅम्य सुंदि शासन जगथ वरतान ।
कैलास वास भासमान 'सास भास्करु' ॥
शंकर सु सर्वशक्तिमान वरि मे ॥० ॥



अर्धनारी श्वरु गौरी शंकरु

अर्धनारी श्वरु गौरी शंकरु, वरदायक गिरि धारी ।
सुरनायक विनायक इच्छा पुत्रु, दर्शनु सर्व प्रकारी ॥
मातानु ग्रेह शक्ति पातु प्रसीध ॥० ॥
दीश कालु वयापकु हिशु रस्ति ईशरु, हे पशुपति विश्वधारी ।
शीषु शायनु अर्च्यतु शेशिशेखरु, निशु बास वृशभु सवारी ॥
मातानु ग्रेह शक्ति पातु प्रसीध ॥० ॥

त्रि धाम त्रिनयनु त्रिपुरान्तक हर, त्रिगुण पुर त्रिपुरारी ।

त्रैनवय कारण त्वतनस चै त्रै अख्यरु, तुरयातीत सर्वन्यारी ॥

मातानु ग्रेह शक्ति पातु प्रसीध ॥०॥

दयि अद्वयि दयि गच्छतम चु प्रेयिवर, करु दयि दयि भयि हारी ।

दयायि चाने जय बनि निरन्तर, हे दयि सर्वउपकारी ॥

मातानु ग्रेह शक्ति पातु प्रसीध ॥०॥

सनमुख बासतम हे गंगाधरु, स्वखु म्वखु वर द्वखहारी ।

हरम्वख नोन चुय स्वरु ब्रम सरु, ग्वरु म्वखु ज्ञान हमसुदारी ॥

मातानु ग्रेह शक्ति पातु प्रसीध ॥०॥

पूरन परषोत्तम परमेश्वरु, प्रेयि वरु प्रीतम प्यारी ।

प्रत्येक परमात्म परात पर हरु, परमानन्द हितकारी ॥

मातानु ग्रेह शक्ति पातु प्रसीध ॥०॥

इष्ट दीव काशी काशमरु, दुष्ट नष्ट कर कष्टवारी ।

संतोष्ट बन सपष्ट चुय येष्टदातरु, सर्वजेष्ट श्रेष्ठ आधिकारी ॥

मातानु ग्रेह शक्ति पातु प्रसीध ॥०॥

आदन सूर व्वन्य नादु ब्यंद अक्षरु, साधन चुय रख्याकारी ।

पादन चैय लगुहोय आदि कोटि 'भास्करु', तत सत् च्यथ सोफारी ॥

मातानु ग्रेह शक्ति पातु प्रसीध ॥०॥



दयि म्यानि अक्षय हे मृत्यञ्जय

दयि म्यानि अक्षय हे मृत्यञ्जय,

भयि कास भास नोन च्वपॉरी ।

शरणॅय च़रनन आसय बु अद्वयि ॥

भयि कास भास नोन च्वपॉरी ॥० ॥

नेत्रन वथरय प्रेम निर्णय नय,

मेत्रन हुंज थाव सरदॉरी ।

पाशु पति असतुरु शोत्रन करतु क्षय ॥

भयि कास भास नोन च्वपॉरी ॥० ॥

धर्म सहकॉरी सॉरी च्वपॉरी,

अमृत चावुख तु मॉरीय कास ।

मरु मरु च़लि युथ साँपनव निरभयि ॥

भयि कास भास नोन च्वपॉरी ॥० ॥

नारस ति गुलज़ार बनि युथ क्षनु क्षनु,

घनु घनु बसन्त बहॉरी ।

ननि नोन अनुग्रेह कर युथ बनि ज़य ॥

भयि कास भास नोन च्वपॉरी ॥० ॥

कालुक काल छुख द्वष्ट छी गालुन्य,

पालुन श्रेष्ठन हुंद सम्बन्ध ।

दिक पाल रॉछ ह्यथ छुख वरदाभय ॥

भयि कास भास नोन च्वपॉरी ॥० ॥

स्वखु म्बखु द्वख कास बास नोन हर म्बखु,
ग्वरु म्बखु चुय छुख सहोरी ।
सनम्बख चुय 'भास्करु' सास आनन्दय ॥
भयि कास भास नोन च्वपॉरी ॥०॥



वंदी मैं तेरे चरणों नन्दीश ईश सरदार

वंदी मैं तेरे चरणों नन्दीश ईश सरदार ।

आनन्द दातु शरणों बन्धनों से कर तू छुटकार ॥ वंदी ॥

तू मालिके ज़मान हो तू खालिके जहां हो ।

व्यापक तू लामकान हो जान हो सर्वुजानदार ॥ वंदी ॥

शक्तीश शक्ति संपन्न भक्तीश भक्ति रंजन ।

मुक्तीश मुक्त कारन दाता तु प्वखतु म्बखतार ॥ वंदी ॥

नाना रूपधारी भक्तों का हितकारी ।

शासन अधिकारी कशमीर राज दरबार ॥ वंदी ॥

यज्ञनेश विघ्न हरता सृष्टि थ्यथ लय करता ।

भक्तों का तू भर्ता धरता अनेक अवतार ॥ वंदी ॥

विनती सुनो महाराज, राखो सदा तू मेरी लाज ।

सिथित करो धर्म राज सरताज बस यह उपकार ॥ वंदी ॥

सुख रूप मुख दिखाओ, हरमुख दुख मिटाओ ।

गुरु मुख विधि सिखाओ, सन्मुख बनो सहाकार ॥ वंदी ॥

कोटि 'भास्कर' चमतकार, सर्व गुन सर्व आधार ।

सतरूप सत आकार, निर्गुण बेयि निराकार ॥ वंदी ॥

योग धारणायि प्राण संदोरुम

योग धारणायि प्राण संदोरुम ।

ध्यान दोरुम शिव शंम्बू ।।

शिव रागुक भस्म तनि पोरुम, ज़ागि ज़ोगुम कॅरिथ वैराग ।
 भावु नागरादु प्रेमु पोन्त्य फयोरुम, ध्यान दोरुम शिव शंम्बू ।।
 दिह अभिमानु ग्यव ज़न कोरुम, अहंकार ज़ोलुम रत्न दीप ।
 मुंह अंधुकारु गटि गाश होरुम, ध्यान दोरुम शिव शंम्बू ।।
 अनहत तारि स्वर यैलि चोरुम, ज़ीरु भम द्राव नादु ब्यंद साज़ ।
 इन्दुरव वोन्दि अमरयथ होरुम, ध्यान दोरुम शिव शंम्बू ।।
 नित्य अनित्य तोसु ब्योन चोरुम, रुमु रुमु सुय ओस रमान ।
 ओमकुय पन दमु दमु खोरुम, ध्यान दोरुम शिव शंम्बू ।।
 शुन्य हुक बिनाह शिव व्यस्तोरुम, वुश्चोरुम क्षनु क्षनु ती ।
 काम कूध लूभ मुह मद मोरुम, ध्यान दोरुम शिव शंम्बू ।।
 तल प्यठ सुय मूल वुश्चोरुम, होस्त मसवालु कोरुम बन्द ।
 मूलादार द्वादशान्त तोरुम, ध्यान दोरुम शिव शंम्बू ।।
 गाटु त्रॉविथ सुय गाटु जोरुम, दय यस दियि तस चलि गाव ।
 शिवु मालिनि शिव हमसु दोरुम, ध्यान दोरुम शिव शंम्बू ।।
 सुबह शामन सु प्रभात गोरुम, छोरुम मंज़ आमु खासन ।
 सास 'भास्कर' पानु व्यचोरुम, ध्यान दोरुम शिव शंम्बू ।।



हे नाथ अनाथनय दया कर

हे नाथ अनाथनय दया कर ।

हे नाथ रमा पति क्षमा कर ॥

दुस्तर महान भवसागर, दिम तार बनावतन गाँव ख्वर ।

रुम रुम रमान चु बाहि अंतर, रुमा चु रोज़ बोज़तु और चर ॥

हे नाथ रमा पति क्षमा कर ॥०॥

हे नाथ माफ़ पाप म्याँन्य कर, संताप त्रेयि व्यद शाप द्वख हर ।

हे नाथ शफ़ाफ़ साफ़ मन कर, हे नाथ मिलापु सुरूप प्राप्त कर ॥

हे नाथ रमा पति क्षमा कर ॥०॥

लोभ काम क्रोध मोह अहंकार, मनु म्यानि निशि दूर कर यकबार ।

राक्षस दुरात्मा दुराचार, व्यचार खडगु करुख समहार ॥

सामराज ग्यानु योग स्यद कर, हे नाथ रमा पति क्षमा कर ॥०॥

यस चॉन्य दया सपनि भरपूर, द्वख शूक चलान फवलान तिमन नूर ।

र्यन रूग वियूग छुख गछान दूर, सम योगु विभूति योग छुख भरपूर ॥

भक्तयन मुक्त गछुन छु मुखतुसर, हे नाथ रमा पति क्षमा कर ॥०॥

निर्गुण सगुन सकल निराकार, माया मयी रूप भाव प्रखचार ।

युग पतु चु धारवुन दश अवतार, सत्य धर्मकुय शान नोन नोमूदार ॥

द्वष्टन दुरात्मन छु मरु मरु, हे नाथ रमा पति क्षमा कर ॥०॥

हे नाथु यि दर्द सोज़ पॅर्ययाद, कन दौरिथ बोज़ सतुक यि संवाद ।
मनज़ूरि नज़र कर व्वन्य चु प्रसाद, रोज़ बोज़ चु सोन ऑरचर नाद ॥
आदन बाजि करतु वादु पूर्यर, हे नाथु रमा पति क्षमा कर ॥० ॥

सुय शाम रमान सुबह शामुय, सुय राम प्रमान आप्त कामुय ।
सुय राम समान परमु धामुय, सुय राम दमान प्रानायामुय ॥
निर्मान सु राम 'सास भास्कर', हे नाथु रमा पति क्षमा कर ॥० ॥

ज्यव दिम मे तिछ युथ बु गीत ग्यवु, अनुग्रेह प्रावु त्रावु प्रवु ।
नवि प्रनवु भास सास रवु, शिवु गाशु अनुभवु शिवु शिवु ॥
तवु नवि नोव द्यवु गछु बु अमरु, हे नाथु रमा पति क्षमा कर ॥० ॥



पोत जूने मोत वुज़नोवुम

पोत जूने मोत वुज़नोवुम ।

ललु नोवुम नारायण ॥

प्रेयि तॅम्य सुंज़ि ही तन नॉवुम, पोश वथरोस प्यठ गोशन ।
रोशि यियिना होश रावु रोवुम, ललु नोवुम नारायण ॥

बालु पान तस पतु रावुरोवुम, हालु कॅमि सुय नालु रटहन ।
शिवु शंभू शुन्य बोलुनोवुम, ललु नोवुम नारायण ॥

कामु दीवस नामु लेखुनोवुम, पामु थविनम कर डेशन ।
रुमु रुमु सुय राम रमुनोवुम, ललु नोवुम नारायण ।।

द्वारु पतु द्वारु वारु वुछुनोवुम, जूनि छोंडुम मंज तारकन ।
मारकन मंज नालु मुचुरोवुम, ललु नोवुम नारायण ।।

ल्वलि मंजलि लोलु ललुनोवुम, बोलुनोवुम सुबुह शामन ।
चीर्य सोवुम सुलि वुजुनोवुम, ललु नोवुम नारायण ।।

जीरु बंमकुय सीर वुजुनोवुम, फेरुनोवुम तति हैरि ब्वन ।
वेरि तँम्य संजि शेरि वातुनोवुम, ललु नोवुम नारायण ।।

जयवु नारु सुत्य वारु छलुनोवुम, तवु लोलुन नार शोलान ।
अँछव बूजुम कनव वुछुनोवुम, ललु नोवुम नारायण ।।

कंदु नाबदु आरदु नोवुम, फंद कॅरिथ यूर्य अनतन ।
रिन्दु लोभमुत व्वंद फवलुनोवुम, ललु नोवुम नारायण ।।

हमसु दारय वारु पान प्रजुनोवुम, प्रारि प्रारोस रामु रादन ।
ब्रमु सरु पान सरु करुनोवुम, ललु नोवुम नारायण ।।

अथु वासय रास खेलुनोवुम, श्वास-ओश्वास नोन छु बासन ।
'सास भास्कर' व्यकास भासनोवुम, ललु नोवुम नारायण ।।

परिपूर्ण नूर बोरमुतये

परिपूर्ण नूर बोरमुतये ।

सूरमोतये आंगन चाव ।।

शांत निर्मल भ्रांत्य कासुवुनये, भासवुनये सास रव ज़न ।

शिव शम्भु अलख बोलमुतये, सूरमोतये आंगन चाव ।।

नंगु भस्मा अंगन मोलमुतये, हटि भुजंग जेटि तस छि गंङ्ग ।

डेकि चंद्रम टेकि ज़ोलमुतये, सूरमोतये आंगन चाव ।।

अलख बूज़िथ तिमु गूर्य बाये, जसदायि सान करान व्यन्ती ।

धनु द्यारव बोरनस फोतुये, सूरमोतये आंगन चाव ।।

ग्यव द्वद थॅनि आरद म्वतुये, कंदु नाबद सु व्वन्दु सान ।

ह्यथ जसदा करान ब्रोंठ पोतये, सूरमोतये आंगन चाव ।।

जूग्य दोपनख यूगी ज़ॉनिव, भूग त्रॉविथ छुस निराहार ।

कामु दीवस भस्मु कौरमुतये, सूरमोतये आंगन चाव ।।

लूब, ख्यूब नहीं नय अभिलाशा, आशा यह एक मन में ।

कृष्ण दर्शुन करनि आमुतये, सूरमोतये आंगन चाव ।।

राधेश्याम को बोलो आदेश, ईश जोगी वेष धर के ।

तमि अभिप्रायि योर आमुतये, सूरमोतये आंगन चाव ।।

बूज जसुदायि ह्यसु व्यसरॉनी, सांई सॉन्य व्यन्था बोज़ ।
खोचि बालुक छु राथ ज़ामुतये, सूरमोतये आंगन चाव ॥

चानि दर्शनु गछि तस छाये, राय क्या छय माय बरहस ।
अघूर भैरव फेर गछ पोतये, सूरमोतये आंगन चाव ॥

जूय वोननस छख अनजॉनी, मान यूगियन हुंद सरदार ।
राज़ ज़गि हुंद माजि ज़ामुतये, सूरमोतये आंगन चाव ॥

सृष्ट सिथित लय अनुग्रेह बैयि दण्ड, अंदु ब्रह्माण्डु नित्य करवुन ।
शीष शाये ईश आमुतये, सूरमोतये आंगन चाव ॥

स्वखु म्वखु सुय द्वख दॉद्य कासान, बासान ज़न सारु निशि ब्योन ।
नोन अनुग्रेह छु बन्योमुतये, सूरमोतये आंगन चाव ॥

द्वष्ट गालुन्य श्रेष्ट छिस पालुन्य, भूमि वालुन छुस व्वन्य बोर ।
कॉल्य कालन पानय पोलमुतये, सूरमोतये आंगन चाव ॥

बार ज़गि हुंद वारु छुस वालुन, गालुन छुस दुष्ट सम्बन्ध ।
पालन कर्म वीदव वोनमुतये, सूरमोतये आंगन चाव ॥

त्रेन भवनन भय सुय कासान, बासान सुय नित्य ननि नोन ।
मूल ज़गि हुंद ब्योल वौवमुतये, सूरमोतये आंगन चाव ॥

योग मायायि समयोग वैरिथुय, प्रेम बरिथुय नित्य हर्षान ।
कृष्ण शंकर वैरिथि नालुमोतये, सूरमोतये आंगन चाव ॥

ईक्षणु किन्य कोरुख वारु सम्वाद, दर्शन आँस्य हर्षानी ।
ती वौनुख यी जगतस ह्योतये, सूरमोतये आंगन चाव ॥

शशि लूसिथ रव खोतमुतये, प्रव तारकन हुंजु चमकान ।
शिव नारान कुनुय गोमुतये, सूरमोतये आंगन चाव ॥

नोन वोन पानु येलि हरुनुय, बरुनुय तौर्य मुन्नरनु आय ।
नेबरु अँदरु ईक बोसमुतये, सूरमोतये आंगन चाव ॥

व्वन्दु इन्दु रव मन फोलमुतये, मंदानुच संद बासान ।
सुब्र शामन मेल कोरमुतये, सूरमोतये आंगन चाव ॥

वीदु वौनी ईकु बाव होवुख, बोवुख कस यि सीरि असरार ।
शामु प्रभात अर्धु म्यूलुमुतये, सूरमोतये आंगन चाव ॥

दीव आकाश पोश वरशाँनी, अछु रछु मचु नचुनस गँय ।
द्राव शम्भू सु आकाश खोतये, सूरमोतये आंगन चाव ॥

कर्म भूमि धर्मुक सोथ द्युन, परम पावन मर्यादा ।
बोर जगतस तुलनि आमुतये, सूरमोतये आंगन चाव ॥

द्वष्ट द्वर्जन नष्ट करुना वुन्य, भरनावुन्य सृष्ट आनन्द ।
ईशु चुय छुख ज्येष्ट मोनमुतये, सूरमोतये आंगन चाव ॥

रक्षा करुन्य स्येदेन तु साधन, वीदु विरुदियन वध करवुन ।
शुद्ध धर्म राजु अंदु गोमुतये, सूरमोतये आंगन चाव ॥

नाद लोयुम तँती लोलु होतये, रासुक बास यान्य वनि आम ।
'सास भास्कर' ज़न पूर्य खोतमुतये, सूरमोतये आंगन चाव ॥



भक्ति भावनायि म्वखतु ब्योल ज़ावो

भक्ति भावनायि म्वखतु ब्योल ज़ावो ।

शक्ति पातु द्राव अनुग्रेह फल ॥

प्वखतु कारन छु तमिकुय चावो, मुक्त म्वखतुसर मानसबल ॥
हमसु पखुवुय पान वुफुनावो, शक्ति पातु द्राव अनुग्रेह फल ॥
नंदु गोरयुन पुरोहित आवो, म्वखतु माल ह्यथ कोरुख मंगल ।
वाख खांदरुक ताख साथ द्रावो, शक्ति पातु द्राव अनुग्रेह फल ॥
हार अनमोल वुछिथ व्यसुर्यावो, मन जसदायि गँयि चंचल ।
यथ छु पुशरुन प्रास थदिनावो, शक्ति पातु द्राव अनुग्रेह फल ॥
बालु गूपाल तमि बालु भावो, बालक ह्यथ करान छल बल ।
गिंदनस सु रिंदु व्वलसनु आवो, शक्ति पातु द्राव अनुग्रेह फल ॥

गँय लजि पजि ती प्रखट्यावो, यी बूजमुत तिमव हलचल ।
 अज मा सनु मन्दुछम नावो, शक्ति पातु द्राव अनुग्रेह फल ॥
 अँदरी तस छँदरुन आवो, यँद्रस सुत्य करि क्या छल ।
 सु छु चोर चोर करान हावु भावो, शक्ति पातु द्राव अनुग्रेह फल ॥
 छालु मारान जॉगिथ आवो, त्याँगिथ लज करनि गांगल ।
 माल नीनस गल में पावो, शक्ति पातु द्राव अनुग्रेह फल ॥
 डालु दिवान शुर्य ह्यथ द्रावो, बनसँरी ह्यथ नयनु पदमु दल ।
 राधा कृष्ण वाद प्रखट्यावो, शक्ति पातु द्राव अनुग्रेह फल ॥
 दम गव तस वनि कस गावो, रुमु रुमु गँयि गुमन तल ।
 ह्यमु कस तु दिमु बुथकस हावो, शक्ति पातु द्राव अनुग्रेह फल ॥
 लारान पतु लँजमुच दावो, प्रारान छितु गँयि निर्बल ।
 हारान म्वखु प्यठु सिरियि तावो, शक्ति पातु द्राव अनुग्रेह फल ॥
 असुवुन रसु बर्वुन चावो, जोनुन लजि गँय मोहमिल ।
 माल कँडुन नालु तु छँकरुनि द्रावो, शक्ति पातु द्राव अनुग्रेह फल ॥
 फलि फलि माल अकी हवावो, छँकरिथ छुनिन मंज जंगल ।
 न्यंगलन छे नार तस लरजु चावो, शक्ति पातु द्राव अनुग्रेह फल ॥
 प्रास क्या दिमु खास छ्वन्यावो, सोन्य गरि नँनि अज प्यठ तल ।
 गँजरनु मा छिनालुय द्रावो, शक्ति पातु द्राव अनुग्रेह फल ॥
 दयु लाज रछ शर्म सीर थावो, आसरु लर त्रॉविथ बरु तल ।
 'सास भास्कर' खास प्रखट्यावो, शक्ति पातु द्राव अनुग्रेह फल ॥



नालमति रटुहथ गंडय त्रेट्य तु मालु

नालमति रटुहथ गंडय त्रेट्य तु मालु ।

बालु गूपालु सॉन्य पालना कर ॥

दाय बोज़ मायि किन्य गॅयस यॅच मतुवालु,

लाये नु मालि पुछि छायि मॅसा रोज़ ।

नबुचन तारन गंडय त्रेट्य तु मालु ॥

बालु गूपालु सॉन्य पालना कर ॥० ॥

वनु वनु मनु मँज्य लँजमुच शर्मि ज़ाल,

म्वखतु माल अनु कति पुशरन बोग ।

म्वखतुसर वनुनम असलुय छि छिनालु ॥

बालु गूपालु सॉन्य पालना कर ॥० ॥

थॅचमुच तापु मँज्य गॅच गॅयि कमि हालु,

मंदछेमुच सॅच पानस करान ।

पनुनी यौद वातिहेख ह्यथ चोलुम दिवान डालु ॥

बालु गूपालु सॉन्य पालना कर ॥० ॥

छालु ओस मारान बालु बालु-गूपालु,

ग्वालु बालु सुत्य यॅच हर्षमय ।

माल कॅडुन नालु तु छॅकरुन बालु बालु ॥

बालु गूपालु सॉन्य पालना कर ॥० ॥

जसुदायि हाल गव यॅच गयि बेहालु,

अहवालु बावि कस कमि हालय ।

गौमुच निहाल गॅयि यॅच दोपुन गव मेहालु ॥

बालु गूपालु सौन्य पालना कर ॥० ॥

बडि नाद लोयनस हतो म्यानि नन्दुलालु,

लोल आम बोलान कृष्ण कृष्ण छस ।

चालि चालि नेत्रन छम म्वखतुन्य चालु ॥

बालु गूपालु सौन्य पालना कर ॥० ॥

अंतरयाँमी ज्ञानान अहवालु,

नालु रॅटन जसुदा ममतायि सान ।

मायि सान असुवुन छुस वनान मिसालु ॥

बालु गूपालु सौन्य पालना कर ॥० ॥

माँजाँय म्वखत् ब्योल कोरमय वनस हवालु,

म्वखतु थरि रँग रँग तु कुल्य फोल्य मॅत्य ।

म्वखतु सुत्य बरनु आयि जंगल कोह तु बालु ॥

बालु गूपालु सौन्य पालना कर ॥० ॥

हिरि ज्ञन स्व गौमुच वीरि नेरि फल निहालु,

सीर बोझ केँछा पछ छस यिवान ।

वीर तति यीरु नतु ज़ोनुन शुर्य खयालु ॥

बालु गूपालु सौन्य पालना कर ॥० ॥

दोपनख नीरिव शुर्य त्रियि बॅड्य तु बालु,

पवखतु कार मवखतस कॅरिव अम्बार ।

फलि फलि खल समि त्राव व्वन्य मलालु ॥

बालु गूपालु सौन्य पालना कर ॥० ॥

सॉरी सॅमिथ आयि ब्रजिलूकु बॅड्य तु बालु,
 म्वखतु कुल्य मूरि-मूरि बॅर्य-बॅर्य वुछान।
 दुर, शाहवार, शब चराग, रॅतनु, लालु॥

बालु गूपालु सॉन्य पालना कर॥०॥

अलमास ज़मरुद म्वखतु नीलम मिसालु,
 बॅर्य-बॅर्य कुल्य तु कानु दानु दानु सेर।
 सासु बॅद्य बागवान लछि बॅद्य द्वारपालु॥
 बालु गूपालु सॉन्य पालना कर॥०॥

काशत्कार लछि बॅद्य ख्वदकाशत नन्दुलालु,
 योगु माया वुछिथ गॅयि हॉरान।
 सॉबरान बक्ति किन्य लूख म्वखतु स्वकालु॥

बालु गूपालु सॉन्य पालना कर॥०॥

मीनिथ बॉगरान कस वॉत्य कुत्य कनालु,
 बॉगरान नन्दुगूर जॉगीरदार।
 सारिवय गरु बॅर्य म्वखतुकी रॅत्य कालु॥
 बालु गूपालु सॉन्य पालना कर॥०॥

बॉगरान बाग्य यस यी ल्यूखमुत कपालु,
 कॉर्यगर म्वछि फोल सॉबरावान।
 डीशिथ पुरोहित केशान तमि हालु॥

बालु गूपालु सॉन्य पालना कर॥०॥

ज़ोनुन वेलु वोत मेलुनुक तमि कालु,
 अनुग्रेह पपुनस नोन शक्तिपात।

गॅणिशि त्रखु सौंवरुनि द्राव आव रुत फाल ॥

बालु गूपालु सौंन्य पालना कर ॥० ॥

खौरु बॅद्य म्वखतु अनमोल बैयि रत्नु लालु,

गॅणिशि त्रखु प्रथ काँसि बौरनस लोल ।

हतु बॅद्य गुर्य बौर्य ह्यथ गव ख्वशहाल ॥

बालु गूपालु सौंन्य पालना कर ॥० ॥

लूकव गर बौर्य म्वखतु प्वखतु खयालु,

नन्दु गूर्य देवार म्वखतुक लोद ।

भक्ति बावु ज़ोनुख सारिविय सु दयालु ॥

बालु गूपालु सौंन्य पालना कर ॥० ॥

सासु बॅद्य गुर्य बौर्य म्वखतु बैयि रत्नु लालु,

प्रास पुशुरनि बोग बृक्ष भानुन ।

सूजुख यश द्राव आकाशु पातालु ॥

बालु गूपालु सौंन्य पालना कर ॥० ॥

पुरोहित थेकि कूत ज़ेवि सुत्य कतालु,

वैकुन्ठ नाथ पानु ब्रज मोहन ।

नौनिदान ह्यथ कुबेर लक्ष्मी दिवान डालु ॥

बालु गूपालु सौंन्य पालना कर ॥० ॥

सुय शाम पीताम्बर नॉल्य वनु मालु,

शेरि मोर मुकटु बंसॅरीधर ।

मक्खतु सर भखत्यन छि मुक्ति तत कालु ॥

बालु गूपालु सौंन्य पालना कर ॥० ॥

तमि वेलु मेलान भँखुत्यन सु कालु,
खेलान अथुवास वॅरिथ रास ।
'भास्कर सास' बॅरय-बॅरय प्रेम प्यालु ॥
बालु गूपालु सॉन्य पालना कर ॥० ॥



राधा कृष्ण बोल लोल छु आमुतये

राधा कृष्ण बोल लोल छु आमुतये ।
नोन द्रामुतये बिन्द्राबन ॥

मोहिनी रूपा दॅरिथ आमुतये, मुह मोतये छुस सोर त्रिभुवन ।
मुह गटि शामु रूप सुबह फोलमुतये, नोन द्रामुतये बिन्द्राबन ॥
रम्बुल्यव केशव तंबुलोवमुतये, त्रिभुवन पति श्री काम मर्दन ।
संबलिथ पथ ब्रोंठ मसतानु मोतये, नोन द्रामुतये बिन्द्राबन ॥
रोनि ग्वड श्रोनिदार स्वरु सामु होतये, वीदु शब्दु शुन्य पूर मुतये ज़न ।
साडि वुडिनि पीतांबर दोरमुतये, नोन द्रामुतये बिन्द्राबन ॥
नॉल्य मालु कनुनय स्वन बारेमुतये, जोरमुतये म्वखतु चूनि लालु मन ।
कछुकर मछुबन्द संदोरमुतये, नोन द्रामुतये बिन्द्राबन ॥
बुमनुय मंज़ सुम खाल कोरमुतये, बर्यमॅतिये नैन मस खाँस्य ज़न ।
शोरि मोर मुकटु म्वखतु जोरमुतये, नोन द्रामुतये बिन्द्राबन ॥
मन्द हास यन्दु ज़न नभु वौथमुतये, तंबुलोव मुतये शिव शंभू ।
तमि रूपु गोकुल सखर्योमुतये, नोन द्रामुतये बिन्द्राबन ॥

वाजि बुगंरि ऑनवाजि राजि रेनि क्युतये, जगि हुन्द राजु मोहन सु मूहान
 कुनु ने द्राव त्रियि वेष दोरमुतये, नोन द्रामुतये बिन्द्राबन ॥
 त्रियि वेष दोरिथि द्राव लोत लोतये, ऑविजि जॉविजि ग्रायि मारान ।
 राधायि वुछने गरि द्रामुतये, नोन द्रामुतये बिन्द्राबन ॥
 आगंन मंज चाव सांग कोरमुतये, नाँग्यन्यन केशन अँलरावान ।
 ब्रम गोख चंद्रमु नभु छु वोथु मुतये, नोन द्रामुतये बिन्द्राबन ॥
 मोहिनी रूपु आलव कोरमुतये, वाजि बुँगरि ऑनु वाजि साज सोरमु सान ।
 राजु दारस योर कुननि आमुतये, नोन द्रामुतये बिन्द्राबन ॥
 दीवन तु जीवन सुय मारमोतये; रेश्य केशान डेंशिहोन ननि नोन ।
 'सास भास्कर' जन पूर्य खोतमुतये, नोन द्रामुतये बिन्द्राबन ॥



ख्वनि मंज ललवथ ईशवेशधारो

ख्वनि मंज ललवथ ईशवेशधारो ।

शाम रूपु निरविकारो वे ॥

माया मसके सोदा गारो, मोहान छुख खँरीदारो वे ।
 आख मालि कुनने कँमि शहारो, शाम रूपु निरविकारो वे ॥
 थोकमुत छु पँक्य पँक्य कोर पतु लारो, पनथन दूर कति प्रारो वे ।
 द्वह दरि लोगमुत प्यठ छुम बारो, शाम रूपु निरविकारो वे ॥
 गोकुल बृक्ष भानुन राजुदारो, डींशिथ गँयि आशचारो वे ।
 संपदायि मायि तस वोनुन यकबारो, शाम रूपु निरविकारो वे ॥

गँहनु पात साजु स्वरमु लाग ज़रकारो, कोरि म्यानि राधायि वारो वे ।
 मँहलु खानु मंजु छुय न कांह अँहलिकारो, शामु रूपु निरविकारो वे ॥
 यूत म्वल मंगुहम दिमय धनु द्यारो, तूल्य तूल्य लोलु सान वारो वे ।
 लोल तस छु तोलुन कुस खँरी दारो, शामु रूपु निरविकारो वे ॥
 मोहिनी राधायि सुत्य सरकारो, डीश्य डीश्य वसान अशिदारो वे ।
 हिशि रँस्य द्वनवय कुनुय आधिकारो, शामु रूपु निरविकारो वे ॥
 रंगु रंगु अंगु अंगु सोलु सिंगारो, बे रंग सारु आवारो वे ।
 वुछ वुछ पुछ्य पुछ्य करान छुस प्यारो, शामु रूपु निरविकारो वे ॥
 कवंगु कोफूरय मुशकु अंबारो, बदनस तस छु प्रखचारो वे ।
 सास रवु प्रवु ज़न मंजु अंदुकारो, शामु रूपु निरविकारो वे ॥
 शीरुन तु पुरन छुस पुछान वारो, मारु मँच छुम अमारो वे ।
 च्वंजु दायि शूबनय स्वर्गु परिवारो, शामु रूपु निरविकारो वे ॥
 गोंडमुत छुय ना विवाह कारो, तान जान मंजु राजु दारो वे ।
 च़ेय हिशि ज़ून शूबि सिरियि प्रकारो, शामु रूपु निरविकारो वे ॥
 छलु छुस पुछान बलु आधिकारो, मेछि मोदरि कथु व्यवहारो वे ।
 त्रियि भाव वौननस कैह लौगुस न चारो, शामु रूपु निरविकारो वे ॥
 दोपनस नन्दगूपी कृष्ण अवतारो, तँस सुत्य छुम मिलचारो वे ।
 मॉल्य माजि कौरमुत सुय व्यचारो, शामु रूपु निरविकारो वे ॥
 मोहिनी दोपनस क्या यि अंधुकारो, शूभि कँरिथ युथ व्यखचारो वे ।
 तव ख्वतु कोनय द्युतनय ज़हारो, शामु रूपु निरविकारो वे ॥
 द्वद थनि च़ूरसुय नटु सांगु दारो, कोर्यन सुत्य वैभिचारो वे ।
 गूरय शुरय ह्यथ छुय न्यथ पँहरुदारो, शामु रूपु निरविकारो वे ॥

वनि रावुल ख्यवान द्वद थनि दारो, शूभि शर्मि रोस कारुबारो वे ।
 बरु बरु फेरान त्रॉविथ गरु बारो, शामु रूपु निरविकारो वे ॥
 क्वलि कोनय छु निनख गँडिथ पथारो, रांडु कूत बांडु मकारो वे ।
 नाज़नीन छख डायि पोशि तुलु हारो, शामु रूपु निरविकारो वे ॥
 राधायि वौनुनस औनुनस आरो, ज़रु छुय नु च़ेय गाटु ज़ारो वे ।
 बरु छस गॉमुच तॅम्य सुंदि अमारो, शामु रूपु निरविकारो वे ॥
 कारन तु यँद्राज़ु बंदु बरदारो, यंदु रव नव ग्रैह सितारो वे ।
 हुकमस छि तॉब्यह छुख सु सरकारो, शामु रूपु निरविकारो वे ॥
 ज़गि मंज़ दारान दशि अवतारो, द्वशटन करान समहारो वे ।
 ज़नमु ज़नमु तॅम्य सुन्द म्योन मिलच़ारो, शामु रूपु निरविकारो वे ॥
 पास छुय नु हास त्राव नासु त्रासु प्यारो, ऑसु कमि द्रोय युथ डकारो वे ।
 'सास भास्कर' छुय तॅम्य सुंद चमंतकारो, शामु रूपु निरविकारो वे ॥
 मोहिनी लोलुक तूल अंबारो, होवनस वृष्णु रूप वारो वे ।
 दारि ओश द्वनवन्य वसान आब शारो, शामु रूपु निरविकारो वे ॥
 अँद्रु नेबरु कृष्णय कुनुय आधिकारो, कुनि रुक नन्यर क्या सहारो वे ।
 कृष्णय राधयि करुवुन प्यारो, शामु रूपु निरविकारो वे ॥
 महाराज़ु बॅन्यथुय यिमय शूबिदारो, कारन तु दीव परिवारो वे ।
 लॅगन कॅर्यथय निमथ सुत्य वारो, शामु रूपु निरविकारो वे ॥
 प्रेमुक वादु दिथ द्राव वारु कारो, संपदायि ह्योतुन म्वल वारो वे ।
 माया तीत सुय ज़गत आधारो, शामु रूपु निरविकारो वे ॥



शीश शायनु ईश नोन द्रावो

शीश शायनु ईश नोन द्रावो ।

आव राधायि वरने ।।

बाल गुपाल ह्यथ ब्रजु बाल, नॉल्य शूबवन्य वनुमाल ।
 वॉल्य कनुनय म्वखतु चूनि लाल, मुकटु डेकि टेकि खाल ।
 पीतांबर सु शाम प्रखटावो, आव राधायि वरने ।।
 सर्वगु अछुरछु नाच करनस, गंदरवु स्वरसाम परनस ।
 यंद्रव गथ करनस, सर्वगु मंडलुक्य द्यान स्वरनस ।
 दुर्गायि वर्गु वनुवानो, आव राधायि वरने ।।
 गरुडवाहन शंख चेंकरुधार, शेरि मुकटु शूबिदार ।
 गौ लोक ज्ञान ब्रजु परिवार, यंद्राजु छत्रबरदार ।
 यूग मायायि हुन्द हावु भावो, आव राधायि वरने ।।
 शूभि सान वोत मंजु राजु द्वार, वैकुण्ठ बन्योमुत गरु बार ।
 गुल तु बुलबुल ह्यथ आबुशार, बूल्य बोलान रूस्य जानवार ।
 राधा कृष्ण कृष्ण भक्ति भावो, आव राधायि वरने ।।
 स्वरगी फरश अरुश ताबान, रंगु रंगु साजु सामान ।
 प्रंग तु पंलग अंगुरा गान, साल खेनि ब्यूठ शूबि सान ।
 येछा भूजन कोरुख भूग भावो, आव राधायि वरने ।।
 लॅगनुक लॅग्न सु पानु महाराज, जगि मोकूफ़ गव छत तै बाज ।
 ब्राह्मनन म्यूल बैयि सामराज, भक्त्यन हुंजु रछु वुन लाज ।
 राजुरेनि माजि होव प्रभावो, आव राधायि वरने ।।

मधु ग्यव डेर खँत्य अँगनस, त्रप्त गव रैह वोच गगुनस ।
 प्रजापत पानु ब्यूठ लँगनस, माया तीत मन मगनस ।
 जगि मंज त्युथ उतसव बन्यावो, आव राधायि वरने ॥
 स्वर्गु अछु रछु यूगिनी गन, विष्णु मायायि वनुवन ।
 कर्म लीखा यूग लेखन, कलशु ग्रेह बीठ्य हर्षु खानन ।
 वर्शु फल रुत प्रखटावो, आव राधायि वरने ॥
 स्वन गँहनु म्वखतु चूनि रत्न लाल, स्वर्गु वस्त्र जोरु शाल ।
 गुरय हँस्य गाँव दनु द्वार माल, धाज राजु रैनि द्राव रुत फाल ।
 वादु पूरयर करान क्रावो, आव राधायि वरने ॥
 संपदा ह्यथ बेयि बृक्षभान, भाँय बंद ह्यथ हरशान ।
 चालि चालि बँखुत्य म्वखतु वर्शान, कृष्णस बेयि राधायि सान ।
 पान आलुवान तु द्राख लाव तावो, आव राधायि वरने ॥
 महाराज ह्यथ सु माहरेन्य द्रावो, युच नन्दु गूर बरुवुन चावो ।
 योगु मायायि भोग प्रखटावो, रयन रूग शूख गँयि अभावो ।
 छुख नु तोशान दय टोठ्यावो, आव राधायि वरने ॥
 दयि पथ रछ गथ नँन्य हावो, भय शूक द्वख दूर करनावो ।
 रयन रूग मुह साँरी हरुनावो, प्रन यूग क्षेम याद पावो ।
 लाज साँन्य रछ मसाँमन्दु छावो, आव राधायि वरने ॥
 वेलु मेलुनुक छुय ना याद, मेलि दय तेलि रुमु रुमु नाद ।
 गेलुन चलि तु गलि उपवाद, फँहलि अँदरु नेबरु कृष्ण वाद ।
 'भास्करु सास' प्रजुलावो, आव राधायि वरने ॥



शाम रूपय हा डांम्बलो

शाम रूपय हा डांम्बलो ।

सुबह फवलान फवलान वलो ॥

शेश शायनु मुकटु दौरी, निशु चुय भास गरुडा सवौरी ।

ईशु न्यर्वेश पाहे मुरौरी, वेश करान करान वलो ॥

सुबह फवलान फवलान वलो ॥०॥

गूरय शुरय गौव वॅछय गूरय बाये, रास खेलुनि गोकुलु आये ।

द्रायि च़ेय पतु कमि अभिप्राये, माय बरान बरान वलो ॥

सुबह फवलान फवलान वलो ॥०॥

प्रेम द्वद थॅन्य बु छायि ख्यौविथ, मायि नाबद खीर खंडु ख्यौविथ ।

चूरि थौविथ कर काँसि हौविथ, हूर प्रारान प्रारान वलो ॥

सुबह फवलान फवलान वलो ॥०॥

साज़ संतूर अनु चानि वेरे, रनु मागुस तमना नेरे ।

बाज़ येलि गछि अदु मा फेरे, नाज़ करान करान वलो ॥

सुबह फवलान फवलान वलो ॥०॥

होश वन्दय कॅबीलु क्रोनुय, रोश करुहय पोश वशौनुय ।

रोशि मति गोसु क्या गौय म्योनुय, पोश छावान छावान वलो ॥

सुबह फवलान फवलान वलो ॥०॥

गूपियन हुंदि गिंदन बाजे, यूगियन हुंदि हा सरताजे ।

माजि ज़ाव कस च़ेय हू राजे, लाज रछान रछान वलो ॥

सुबह फवलान फवलान वलो ॥०॥

ख्वनि ललवथ यिखना कुने, दिख चु दर्शुन वन्दु हँय म्वने ।
रोनि जामन जरहय चूने, जूनि गिंदान गिंदान वलो ॥

सुबह फवलान फवलान वलो ॥०॥

तारकन मंज वँन्य दिनि नेरय, मारकन मंज पतु पतु फेरय ।
'सास भास्कर व्वलास पौरय, रास गिंदान गिंदान वलो ॥

सुबह फवलान फवलान वलो ॥०॥



रटुहथ बु नालय चु सालु यिखना

रटुहथ बु नालय चु सालु यिखना ।

बु प्यालु प्रेमुक्य बरय हा लालो ॥

वजान स्रेहुच तार वुजान यि लोलु नार ।

दँजिथ मे पेयम शाह परय हा लालो ॥

बु प्यालु प्रेमुक्य बरय हा लालो ॥०॥

जरु जरु गौजथस सरि शामु लौजथस ॥

काचु जून जन बो दरय हा लालो ॥

बु प्यालु प्रेमुक्य बरय हा लालो ॥०॥

फिरान दफतर स्वरान दौदी ।

परान वरक अनपरय हा लालो ॥

बु प्यालु प्रेमुक्य बरय हा लालो ॥०॥

ग्वालु वेंछ्य गाँव छि नालु दिवान ।

सु लालु मा गव गरय हा लालो ॥

बु प्यालु प्रेमकुय बरय हा लालो ॥० ॥

ऋषि आयि केशान जाँह छिनु डेंशान ।

बो मालु पोशन करय हा लालो ॥

बु प्यालु प्रेमकुय बरय हा लालो ॥० ॥

लागय बु सँन्यास गोपालु यिखना ।

बु ल्वलि मंजुल करय हा लालो ॥

बु प्यालु प्रेमकुय बरय हा लालो ॥० ॥

कलन कोसतूर चलन रटन वन ।

बु कॉल्य हियु तन हरय हा लालो ॥

बु प्यालु प्रेमकुय बरय हा लालो ॥० ॥

तवय बु बरु तल छुस लर त्रॉविथ ।

चु पास कर 'भास्करय' हा लालो ॥

बु प्यालु प्रेमकुय बरय हा लालो ॥० ॥



वॅन्य दिमहोस बिन्द्राबनसय

वॅन्य दिमहोस बिन्द्राबनसय ।

कथ वनुसुय रॅटनम जाय ॥

सॅमिवीय-सॅमिवीय हा सॅखियो, स्वखु म्वखु दय नोन द्राव ।

शामु रूपा नालु रटुहोन,

बालु पानय वनि आव ।

गूपाल ह्यथ गूवर्धनसुय, कथ वनुसुय रॅटनम जाय ॥
 लोलु वॉनी नादा लायोस, पोशिनूलु वादु गोविंदु गू।
 नादु ब्यंद तारि जीरु बम वायोस, कृष्णु गूपी सू हम सू।
 दक्षिनायनु उतरायनुसुय, कथ वनुसुय रॅटनम जाय ॥
 मोल मॉज बन्द कॅबीलु क्रोनुय, त्रॉविथ मान बेयि अवुमान।
 पर तु पान वारु कुनुय ज़ोनुय, चिनमय भाव स्वरौ द्यान।
 छस प्रतिज्ञा योगक्षेम दिनसुय, कथ वनुसुय रॅटनम जाय ॥
 कवलन पोन्य फ्यूर कुल्यन थुह द्राव, वसंत असुवुन बाहन मासन।
 वंदु च़ोल व्वन्दु फोल नव बहार आव, गिंदान नन्दुलाल सुत्य दासन।
 अँस्य ति थफ करहोस र्वनि दामनु सुय, कथ वनुसुय रॅटनम जाय ॥
 लोलु मंज़ुलि ल्वलि ललुनावोन, च़ूरि थावोन हावोन कस।
 गूरु करुहोस व्वदि मंज़ सावोन, नैत्य चावोन प्रेमुक रस।
 पान आलुवोस नारायणसुय, कथ वनुसुय रॅटनम जाय ॥
 च्वयिशीत लछ ज़ीव हर्शनसुय, दर्शनसुय दीवता आय।
 म्वखतु कुल्य खँत्य तिथिस वर्शनसुय, सपर्शनसुय छि गूपयन माय।
 रेश्य क्रेशान आकर्शनसुय, कथ वनुसुय रॅटनम जाय ॥
 प्रेम रासय अथुवास कॅरिथय, 'सास भास्करु' छु नैत्य चमकान।
 नाद लायोस हर्शु रसु बॅर्यथय, सुलि नेरव कॉफ़िलु छु दूरान।
 द्वह दरि गछि पतु लारनुसुय, कथ वनुसुय रॅटनम जाय ॥



फवलवुनि सोंतय छुय म्योन सालो

फवलवुनि सोंतय छुय म्योन सालो ।
लालो अज़वलो माल्युन म्योन ॥

आरवलि आरुक्रँज गॅयि कमि हालो,
च़ालि च़ालि ओश दारि हारान छस ।
यँचकाल गव व्वन्य प्रारु कूत कालो ॥
लालो अज़वलो माल्युन म्योन ॥०॥

यँम्बुरज़ल लँजमुच़ बोंबरुनि ज़ालो,
प्यालु ह्यथ मसवल प्रारान छय ।
दूरिरुक दाग दिलस ह्यथ छुय गुलालो ॥
लालो अज़वलो माल्युन म्योन ॥०॥

मायि चानि सुलि वुलि फवजि ही मालो,
लुयि लोसु यी कर दियि दर्शुन ।
द्रुय चॉन्य छम व्वन्य यूत नो बु च़ालो ॥
लालो अज़वलो माल्युन म्योन ॥०॥

रोशु रोशु करुहय पोशन मालो,
रोशि मति गोय ना गोशन म्योन ।
रोशि मा पोशि नूल द्वह गछ़ि व्वबालो ॥
लालो अज़वलो माल्युन म्योन ॥०॥

आदुनुक याद पाव वॉदु मो डालो,
नाद लोय कुकिलव गोविंदु गू।
आदन बाजि म्यानि त्राव शुर्य खयालो ॥
लालो अज़वलो माल्युन म्योन ॥० ॥

बॉल्य वन्तु यियिना नॉल्य छस मालो,
वाल्य छिस कनुनय ग्रायि मारान।
कॉल्य मा रावव कस क्या मलालो ॥
लालो अज़वलो माल्युन म्योन ॥० ॥

साक़ुया प्याल् चाव माला मालो,
युथ न सॉ बाकी रोज़ि ग्राव।
वाक़ुय रसु रसु बनू मतवालो ॥
लालो अज़वलो माल्युन म्योन ॥० ॥

सासु मंज़ु खास सुय रटुहोन नालो,
सास मलि सॅन्यास मेलि गूपाल।
'भास्कर सास' छुय नॉली नालो ॥
लालो अज़वलो माल्युन म्योन ॥० ॥



गोपी नाथ भक्ति रखिपालो

गोपी नाथ भक्ति रखिपालो ।

गोपालो अज़ वलो सोन ॥

गूर्य गूपी वॅछ्य बृजु बालो, प्रारान छिय वाति छालु मारान ।
 बालु गोपालु नॉल्य वनु मालो, गोपालो अज़ वलो सोन ॥
 लुयि लोसु प्रारान प्रारु कूत कालो, प्रेयि हीय तन नॉविथ छस ।
 द्रुय चॉन्य छम बु नो व्वन्य चालो, गोपालो अज़ वलो सोन ॥
 रुशि रॅसति ईशु देशु रखिपालो, निशि गूपियन वेश दारान ।
 दारि दारि छम अशिने चालो, गोपालो अज़ वलो सोन ॥
 नालु रटुहोन कॅमिताम हालो, बालु पानय त्वर्ल ललुनावोन ।
 सुलु नॉवतने क्या गोस मलालो, गोपालो अज़ वलो सोन ॥
 सोंथ आव तय द्राव रुत फालो, रंगु रंगु फोल्य गुल तु गुलज़ार ।
 बहार नोन द्राव क्वनु आख सालो, गोपालो अज़ वलो सोन ॥
 गुल तु गुलज़ार द्रायि पातालो, ज़गतुचि थरि आयि फवलनस ।
 माय करुहोस अछि पोशि मालो, गोपालो अज़ वलो सोन ॥
 वीर यीरु गयि गिन्द्य गिन्द्य चालो, शेश पंजिक्यन चंजिनुय तल ।
 लॅग्य शेशदर प्यठ दुखालो, गोपालो अज़ वलो सोन ॥
 दीनु दयालु हीनु कृपालो, धर्मस खुर कर्मुन कास ।
 नतु मोदुर मस औदुर ज़ंजालो, गोपालो अज़ वलो सोन ॥
 वेलु मेलनुक फवजि संगर मालो, शामु प्रभातु कर अथुवास ।
 'सास भास्कर' भास प्रथ कालो, गोपालो अज़ वलो सोन ॥



शामु रुपु वलो आम लोलुये

शामु रुपु वलो आम लोलुये ।

बु करय ख्वनि मंजोलुये ॥

शेरि मोर मुकटु विराजमान, पीताम्बर धरु सर्वशक्तिमान ।

म्बखतुकेश केश रम्भोलुये, बु करय ख्वनि मंजोलुये ॥

गूरय गूपी वॅछ्य गाँव जानावार, च्वयि शीथ लछ ज़ीवन व्यसतार ।

राधा कृष्ण कृष्ण बोलुये, बु करय ख्वनि मंजोलुये ॥

अथुवासु प्रथ अँकिस खेलान रास, अकरय कुनुय ज़नतुभासान सास ।

बे रंगु रंगु सांवलुये, बु करय ख्वनि मंजोलुये ॥

पोशु अंबरन बाँबुर ज़न व्यूर छारान, यँम्बरज़ल ज़न अंबर हारान ।

जानवर करान कलोलुये, बु करय ख्वनि मंजोलुये ॥

रोशु रोशु गोशान पोश वथुरान, पंपोशु नेत्रव हर्ष वशीन ।

होशु पोशुनूल येरि ओलुये, बु करय ख्वनि मंजोलुये ॥

सिरयि चंद्रम बेयि तारागन, प्रेदिख्यन करुवन्य छि बिन्द्राबन ।

मेलि खेलि रासु मंडोलुये, बु करय ख्वनि मंजोलुये ॥

दीवी अछु रछु तारा गन, गूपी बॅनिथ आयि बिन्द्राबन ।

अर्मान छुख यँचकोलुये, बु करय ख्वनि मंजोलुये ॥

ब्रह्माहस प्यठु रेयि सँयि हर्शन, आकाशु देवता पोश वर्शन ।
 शंकरस यि वुछिथ मन डोलुये, बु करय ख्वनि मंजोलुये ॥
 शख प्योस क्या सना छा यि महाराज, सरताज द्रौपदी रछु वुन लाज ।
 जगि हुन्द ताजि मलोलुये, बु करय ख्वनि मंजोलुये ॥
 सरु करनुय तस सु सरदार प्यव, गूपिया बँनिथ ब्रजु भूमी गव ।
 ओम भूर भुवः दिवान ज़ोलुये, बु करय ख्वनि मंजोलुये ॥
 शे र्यथ राथ गँयि छुसनु कँहति बास, रासस मंज वुछुन निराभास ।
 कृष्ण जू म्वरली वोलुये, बु करय ख्वनि मंजोलुये ॥
 सुपर्शु किन्य ऑस्य यँच हर्शन, विर्मश ह्यथ नेत्रव वर्शन ।
 चंद्र मंडलु ज़न म्वखतु ब्योलुये, बु करय ख्वनि मंजोलुये ॥
 साम स्वर कामु दीवुन यि संवाद, आकाशु पातालु सुय ब्यंदु नाद ।
 नचान ह्यथ ध्रुव मंडोलुये, बु करय ख्वनि मंजोलुये ॥
 योगु बलु दलु दलु दान दारिथ, तल प्यठ दशमु द्वार व्यसतारिथ ।
 सँहसरु दलु ग्यानु दीप ज़ोलुये, बु करय ख्वनि मंजोलुये ॥
 ज़न्मु ज़न्मु छारान गोम यँचकाल, वाँस सूर प्रारान छँत्य गँयम बाल ।
 लोल आम छुम गोमुत होलुये, बु करय ख्वनि मंजोलुये ॥
 व्यकुन्ठुक भास बिन्द्राबन, 'सास भास्कर' छु नोन परिपूरन ।
 म्वख हाव द्वख ति कूत च़ोलुये, बु करय ख्वनि मंजोलुये ॥



द्रायि राधा ह्यथ गूर्य बाये

द्रायि राधा ह्यथ गूर्य बाये ।

मायि कृष्णनि दिवान वैन्य ॥

शामु रंगु नय मंज सुबह शामन, पोशु ज्ञाँचन मंज जंगलन ।

ब्रॉच छायेन तँम्य सुंजि राये, मायि कृष्णनि दिवान वैन्य ॥

छेत्य व्वजुल्य नील्य रंगु रंगु पोशन, रोशु गोशन नालु रटुहोन ।

होश रूदुस नु तमि अभिप्राये, मायि कृष्णनि दिवान वैन्य ॥

प्राण अपान पर तय पानय,

गोसु मँशरिथ गँयि यकसान ।

शुन्य त्रॉविथ शिव दारुनाये,

मायि कृष्णनि दिवान वैन्य ॥

द्वादशांत चे पँत्यमे द्वारय,

ज़ून डबि बीठ रोदुन वोन ।

शांत प्रकाश तति वुछु नाये,

मायि कृष्णनि दिवान वैन्य ॥

गटु कति तति अटल गाशिय,

शोडश कला नोन सु प्रकाश ।

अमर्यत ब्यंद शेशि कलाये,

मायि कृष्णनि दिवान वैन्य ॥

अनुहत शब्द मुर्ली वाधय,

नादु ब्यंदुक ज़ीरु बंम साज़ ।

गोस कनन मनुवनु आये,

मायि कृष्णनि दिवान वैन्य ॥

अँद्रु न्यबुर्य सु सुंदर शामय,

रुमु रुमु राम रमान ।

ओम सूहम परान कृष्ण राये,

मायि कृष्णनि दिवान वैन्य ॥

यूर्य अनतन रूद कथ शाये, वनु वनुनय ननि ख्वतु नोन ।
द्वारिकायि छा किनु मथुराये, मायि कृष्णनि दिवान वॅन्य ॥

सॅमिवी नेरव फेरव वनुनय, कॉल्य मरव क्या छु अरमान ।
रोशि पोशु नूल द्वह गछि छाये, मायि कृष्णनि दिवान वॅन्य ॥

सॅमिवी सॅखियव वॅन्य दिनि नेरव, बालु पानय सु नालु रटुहोन ।
राधा कृष्ण कृष्ण राधाये, मायि कृष्णनि दिवान वॅन्य ॥

ब्बद राधा वॅच्च गूर्य बाये, प्रॅच्च प्यथ स्वरान कृष्ण राधा ।
पान नावान ग्यानु गंगाये, मायि कृष्णनि दिवान वॅन्य ॥

बावु द्वद थॅन्य नेरव कुनुने, पानु दय फेरि खॅरीदार ।
युथनु परमानु आसन छोन्य त्राये, मायि कृष्णनि दिवान वॅन्य ॥

गुल तु गुलज़ार गासु आबशारय, रूस्य बोम्बुर बैयि जानावार ।
कृष्ण गूपी परान भाखाये, मायि कृष्णनि दिवान वॅन्य ॥

मेलि सौदा सास कर गेलन, खेलि अथुवास वॅरिथ रास ।
'सास भास्कर' सु प्रेम माये, मायि कृष्णनि दिवान वॅन्य ॥



उदव लोलु नारु दॅज़ सॉन्य तन

उदव लोलु नारु दॅज़ सॉन्य तन ।

चु वन कर वाति मन मोहन ॥

वनन वॅन्य दिथ छि लायान नाद, कनन गोस ना सु म्योन फॅर्ययाद ।
 सु छा मथुरायि बिन्द्राबन, चु वन कर वाति मन मोहन ॥
 द्यनस रातस क्षनस सातस, छि प्रारान शामु प्रभातस ।
 चोलुय त्रॉविथ मुहिथ तन मन, चु वन कर वाति मन मोहन ॥
 नचान अथुवास कॅरिथ द्यन राथ, बजावान बन्सरी एक हाथ ।
 सु शामु प्रभात सुबह शामन, चु वन कर वाति मन मोहन ॥
 वनन वॅछ्य गॉव वॅन्य दिवान, गरन मंज़ गूपी रिवान ।
 बरन प्यठ तिम प्रारि प्रारान, चु वन कर वाति मन मोहन ॥
 वज़नु रोस योसु वज़ान स्वय तार, दज़नु रोस युस दज़ान लोलु नार ।
 बनुन दीपक मलुहार तत क्षन, चु वन कर वाति मन मोहन ॥
 अँगुन ज़ल बैयि पवन बुतरात, च़राच़र जीव द्यन क्यहो रात ।
 स्वरान कृष्णय करान धन धन, चु वन कर वाति मन मोहन ॥
 कॅरिथ नित्य रासु मंडलुक ग्यूर, बोंबुर अम्बरस तुलान तति व्यूर ॥
 दिगम्बर 'सास भासकर' ज़न, चु वन कर वाति मन मोहन ॥



ओम परवुन हंसु ताजदार

ओम परवुन हंसु ताजदार ।

कमि वनुकुय जानावार ।।

जालु लगी ना सुय अनका,	मालु गँडुहस छुम तमन्ना ।
नालु रटुहन सुय बालुयार,	कमि वनुकुय जानावार ।।
कोछु बु दिमुयो हा कावो,	गछतु वनंतस दी दर्शुन ।
वछि वाँलिजि बावस असरार,	कमि वनुकुय जानावार ।।
पोशु नूलव पोरूय हम सू,	कुकिलु बोलान गोविंदु गू ।
हरु म्वखु छा किन हरद्वार,	कमि वनुकुय जानावार ।।
प्यठ गोशन रँटुनम जाय,	काँल्य पोशन पैयि मा हाय ।
व्वन्दु हँदेरेस तु रोशि चँल्य यार,	कमि वनुकुय जानावार ।।
खत बु लेखस हटि के रतु,	जाँविलि कतु सतु शूबि दार ।
यी नतय छस बु दावादार,	कमि वनुकुय जानावार ।।
बाँल्य अनतने दूरि मा काँल्य,	आँल्य जिगरस गँयिमय परु काँल्य ।
नाँल्य जामु तस छि ज़रकार,	कमि वनुकुय जानावार ।।
हमसु पखवुय पतु लारोस,	प्रारि प्रारोस डंडक वन ।
द्वह दरि गछि सोरि ल्वकचार,	कमि वनुकुय जानावार ।।
दुर्दु सोजुक संतूर साज़,	सासि पर्दि ग्योव कोसतूरय राज़ ।
बुति ती ती वनान क्वलुतार,	कमि वनुकुय जानावार ।।
‘भास्कर’ चेन्तन सासन मंज़,	रुमु रुमु खास छु भासाँनी ।
ललुवुन छुम सुय सीरि असरार,	कमि वनुकुय जानावार ।।

गो वर्दनु गिरिधर

गो वर्धन गिरिधर ।

सुन्दर सु शाम यियि कर ॥

गँडुहोस त्रोट्य तु मालय, बरहोस प्रेम प्यालय ।
जरुहोस चूनि लालय, करुहोस प्रणाम यी कर ॥

सुन्दर सु शाम यियि कर ॥०॥

वुछुहोन अँछव मनोहर, लछु नोव सु शाम सुन्दर ।
गछि कुठि करुहोस चामर, रुमु रुमु सु राम यी कर ॥

सुन्दर सु शाम यियि कर ॥०॥

मनविथ चु गछतु अनतन, रूद कति खँटिथ रँटिथ वन ।
छुम दारि ओश अँछ्यन, सँर्य गछि तमाम यी कर ॥

सुन्दर सु शाम यियि कर ॥०॥

यी ना सु सोन आदन, कन थावि लोलु नादन ।
अँजरावि लॉन्य वादन, गँजरे सुदाम यी कर ॥

सुन्दर सु शाम यियि कर ॥०॥

कर वाति सु सोन मोहन, लोलु नारु दँज मै हन हन ।
शोलान यि नार छु दरतन, फँहलि तालि ताम यी कर ॥

सुन्दर सु शाम यियि कर ॥०॥

खेलि रास तेलि येलि राग, मेलि दय छु धन धन भाग ।
'भास्कर' सु वेलु तथ ज़ाग, योद गेलि आम यी कर ॥

सुन्दर सु शाम यियि कर ॥०॥



ल्वलि ललुवथ थावथ सुलुनॉविथ

ल्वलि ललुवथ थावथ सुलुनॉविथ ।

वलुसॉ सोन शामु स्वंदरो स्वंदरो ॥

पवुनुकि नारु तन छसयो नॉविथ, छुमवुहान लोलु तोन्द्रो तोन्द्रो ।

शवनु शेशकलि पान शेलॉविथ, वलुसॉ सोन शामु स्वंदरो स्वंदरो ॥

रंगु रवकन प्रंग वथुरॉविथ, नेन्द्र वुजतु राजु यँद्रो यँद्रो ।

केह नो मंगुयो गछतम पान हॉविथ, वलुसॉ सोन शामु स्वंदरो स्वंदरो ॥

हर्दु जर्दी पोश फवलुनॉविथ, पोशु नूल मा हँद्रो हँद्रो ।

गोविंद गू वखुन परनॉविथ, वलुसॉ सोन शामु स्वंदरो स्वंदरो ॥

नाद लायय वादु याद पॉविथ, लोल आम कृष्ण गँद्रो गँद्रो ।

प्रेमु द्वद थँन्य गछय ख्यावनॉविथ, वलुसॉ सोन शामु स्वंदरो स्वंदरो ॥

रोशि मो रोशि होश रावुरॉविथ, पोश लागय ग्वंद्रो ग्वंद्रो ।

कीनु भावय सीनु मुचुरॉविथ, वलुसॉ सोन शामु स्वंदरो स्वंदरो ॥

हमसु पखवुय पान वुफुनॉविथ, ब्रह्म रन्द्र मन्दिरो मन्दिरो ।

‘सास भास्कर’ रास खेलुनॉविथ, वलुसॉ सोन शामु स्वंदरो स्वंदरो ॥



गछतु बोंबरु वुछतु बे रंग

गछतु बोंबरु वुछतु बे रंग शामु रंग आकार छा ।

न्यर द्वंद शिव नादु ब्यंद छा सिरियि चंद्रम तार छा ॥

द्वख चलि सनम्वख सु वुछ होन स्वखु म्वखु द्यवु नेरि नोन,

म्वखु म्वखु छा ग्वरु म्वखु छा हरु म्वखु हरद्वार छा ।

गछतु बोंबरु वुछतु बे रंग शामु रंग आकार छा ॥

वोंत तस छुन ब्राँत्य करवुन सूत्य पजिह्यस वातुनस,

हर्दु जर्दी नव बहार सुय गुलज़ार छा गुलनार छा ।

गछतु बोंबरु वुछतु बे रंग शामु रंग आकार छा ॥

हौर्य पर्वतु प्रारि प्रारोस शंङ्कराचौर्य वॅन्य दिमोस,

तार सरु छा मार सरु छा खनुबलु खादन्य यार छा ।

गछतु बोंबरु वुछतु बे रंग शामु रंग आकार छा ॥

मार मटि छुस पान मारव मारमौत नय वाति सोन,

अमारु तॅम्य सुंदि नार छु ललवुन अंगार छा अबुखार छा ।

गछतु बोंबरु वुछतु बे रंग शामु रंग आकार छा ॥

दीव कारन रेश्य मुनीश्वर बिन्द्राबनु वॅन्य दिवान,

द्वारिकायि छा मथुरायि छा गूकलय गिरिद्वार छा ।

गछतु बोंबरु वुछतु बे रंग शामु रंग आकार छा ॥

तावनुन बाज़ार यि समसार खाम सौदा यावुनुन,

कर्म फल सूरिथ छि च़लु लार यकरार छा इनकार छा ।

गछतु बोंबरु वुछतु बे रंग शामु रंग आकार छा ॥

बिन्द्राबनु नैत्य छु गिंदुवुन शामु स्वंदर सुत्य अंसे,
 दानु मय छा ग्यानु मय छा निर्वानि योगाकार छा ।
 गछतु बौबरु वुछतु बे रंग शामु रंग आकार छा ।।

सासु नुय सुत्य रास खेलान बासुवुन क्षनु क्षनु छु नोन,
 दास प्रारान करि अथुवास 'भास्कर' तीजु दार छा ।
 गछतु बौबरु वुछतु बे रंग शामु रंग आकार छा ।।



बहार आव कोनु आव दिलदार इम शब

बहार आव कोनु आव दिलदार इम शब ।

चलय वैस्य गछ वनुस विलज़ार इम शब ।।

हियन गव अँर्यनि रंग लुयि लोसु प्रारान,

यँबुरज़ल चेशमु पुर खुमार इम शब ।

बहार आव कोनु आव दिलदार इम शब ।।

दिमव छोह रोव करव द्वह तारु गिंदुहव,

क्वलन पोन्य फ्यूर कुल्यन सबज़ार इम शब ।

बहार आव कोनु आव दिलदार इम शब ।।

सु रसु रसु वैस्य चु अनतन हाल बावोस,

तसुंदे हावसु मे छुम वसि नार इम शब ।

बहार आव कोनु आव दिलदार इम शब ।।

चु प्रछतस म्यानि ज़ेवि अदु गोसु मा गोस,
वुछान अँछ लोसु दर इन्तिज़ार इम शब ।
बहार आव कोनु आव दिलदार इम शब ॥

गँनीमत ज़ान तु ई दम रोज़ि मा कौल्य,
पगाह मा मटि छुय म्योन मार इम शब ।
बहार आव कोनु आव दिलदार इम शब ॥

ह्यमस ज़ाग नॉग्य रायस छॉग्य वालन,
सहान हीमाल ज़ॉहर्य मार इम शब ।
बहार आव कोनु आव दिलदार इम शब ॥

करान लैला-लैला मसतु मजनून,
ज़िंदय दरगोर शोबिबेदार इम शब ।
बहार आव कोनु आव दिलदार इम शब ॥

मे गोमुत सूर दूरयर कोताह बु चालय,
बु छुस ललुवान तिमय अंगार इम शब ।
बहार आव कोनु आव दिलदार इम शब ॥

रिन्दव ग्युंदनाह कौरुख ज़िंदु पानु मरुनुय,
परान मंसूर अन बरदार इम शब ।
बहार आव कोनु आव दिलदार इम शब ॥

तवय 'भास्कर' दिवान सासन अन्दर नाद,
छु अज़लुक पानु वौन्य मिल चार इम शब ।
बहार आव कोनु आव दिलदार इम शब ॥



सुदर्शन चॅखुर ह्यथ नोन नेर

सुदर्शन चॅखुर ह्यथ नोन नेर धर्मक शान पैदा कर ।

यिथिस वकतस चु शक्तिमानु तिथी सामानु पैदा कर ॥

सनातन धर्मचुय रछ लाज पनुन प्रन वारु व्वन्य पाव याद ।

अर्धमुच गाल व्वन्य बुनियाद सु गारगी यान पैदा कर ॥

गुलन खारन कुनुय माने अन्यायस न्यायिकुय तकरार ।

पुण्यस पापस गोमुत यक सान तम्युक अवज्ञान पैदा कर ॥

क्वटम्ब योवन धनुक मुह मद अनर्थुक यॅन्न गोमुत अभिमान ।

सिर्यु प्रंछड दंडुक कूप तिमन अवमान पैदा कर ॥ ✓

परित्रानाय साधूनाम विनाशाय चु दुष्क्रताम ।

धर्म संस्थाप नार्थाय अदु पनुन पान पैदा कर ॥ ✓

सनातन वेदु मुर्यादा ब्रंमाडस हेरि व्वनु प्रखुटाव ।

दुरात्मन द्वर्जनन हुन्द क्षय ब यक आन फ़ान पैदा कर ॥ ✓

दयानन्द शंकराचार्य महात्मा बुद्ध विक्रम वीर ।

सुवेना दत्त ललत प्रवेरश सिन्धेमान पैदा कर ॥ ✓

गुरू गोबिन्द नरसिंह रूप नानक देव शिवाजी ।

सिद्धि ऋद्धि ह्यथ सत् ग्यान सदा सन्निदान पैदा कर ॥ ✓

सनक सतुरेश तु व्यास गोतम अगस्त नारद तु बेयि भारदवाज़ ।

सनानत वीदु कुय प्रखचार क्रेयायव सान पैदा कर ॥ ✓

फरशु पयठु अर्शसुय तामथ सुरोशन गौशुनुय करुनाव ।

रियाकारन सितमगारन उलट पुलटान पैदा कर ॥

नवन पीठन अन्दर आर्डर नवन नाथन हुन्दुय सामराज ।

तमिक्कय जिमवार नव स्यद्ध प्रदान हनुमान पैदा कर ॥

सर्प बदरुवा तु बिच राम हून्य यिथिस समयस तिमन फ़ान कर ।

बुनिल्य गगुरायि त्रटु तूफ़ान तलुक पयठ फ़ान पैदा कर ॥

यि गटु छटु छाय कास अंधुकार प्रत्यक्ष बास सास 'भासकर' नोन ।

बहार हरदुचि ज़र्दी हाव हज़ार दास्तान पैदा कर ॥



रटुहथ बु नालु व्वलु सोन सालु कृष्णा

रटुहथ बु नालु व्वलु सोन सालु कृष्णा ।

गंडय त्रोट्य तु मालु त्राव मलालु कृष्णा ॥

नेन्द्रि हति गछतु बेदार चुय स्वंदर शाम ।

गँडिथ कोसतब बैयि वनुमालु कृष्णा ॥

चोतुरबोज़ मोर मुकटु चँक्रदोरी ।

वैलिथ पीतांबर दुशाल कृष्णा ॥

पनुन प्रन योगु क्षेमुक याद चुय पाव ।

मँजिल दूरयाम द्वहगोम बालु कृष्णा ॥

थॉव्य बॅरय बॅरय द्वद थॅन्य प्रेमु माये ।

चतम श्वदु बावु ऑम्य ज़ॉम्य प्यालु कृष्णा ॥

वनन वनुवान वॅन्य दिथ नाद लायय ।

चु मनु मथूरायि मारान डालु कृष्णा ॥

वैविथ ब्योल मवखतु कुय जंगल फोलिथ आय ।
ब्रजुक्य तमि हालु गैयि निहालु कृष्णा ॥

सतुच अथुवास दासन बास ननि नोन ।
दिवान 'भास्कर' छु लोलु चि नालु कृष्णा ॥



गंडय त्रोट्य तु मालु अज सोन सालु यिखना

गंडय त्रोट्य तु मालु अज सोन सालु यिखना ।
जगत रखिपालु कॅन्या लालु यिखना ॥

पनुन प्रन पाव याद नोन बोज फॅर्याद ।
सनातन धर्म पुछ्य गोपालु यिखना ॥

कुसंगु किन्य रंगु रंगु तंग आयि बुतरात ।
नरसिंह अवतार येमि कलि कालु यिखना ॥

छि प्रारान प्रारि गूपी गाँव छारान ।
बैनिथ मस्तानु मच्चु मुतवालु यिखना ॥

नेत्र वैथरय वतन मथुरायि गोकुल ।
कला पूर्ण चु कंसुनि कालु यिखना ॥

छि फेरान जंगलन न्यंगलान विरह नार ।
बुछान आकाश नतु पातालु यिखना ॥

चै प्रारान वाँस सूर छनु काँसि हुंज कल ।
बुछान फिर्य फिर्य वसान अशिचालु यिखना ॥

फोलिथ वुन्यक्यन छु लोलुन बाग़ शोलान ।

हर्द ज़र्दी अदु अकालु यिखना ।।

कैरिथ अथुवास सतुकुय रास खेलव ।

चु नोन 'सास भास्कर' निरालु यिखना



कुनि यिखना यावन चूरय लो लो

कुनि यिखना यावन चूरय लो लो ।

ख्वनि ललुवथ करय बु गूर गूरय लो लो ।।

नेन्द्रि बेदार कैरथस तु त्रॉथम रव ।

वनन वनुवान च़ेय यँद्रुनि हूरय लो लो ।।

प्यालु बरुहय द्वह पौंशि यितु सालस ।

तन बु नावय क्वंगु कोफूरय लो लो ।।

शमह रोयस पथ च़ेय गथ करु ना ।

पान आलुवय जन पौंपूरय लो लो ।।

लौल्य बु करुहय म्वल्य कुनि मेलरवना ।

आदम खावु अँशुकनि चूरय लो लो ।।

मछि मछु बन्द हच़ि कुय छुख चु बावोट ।

मनके चूरु कनके दूरय लो लो ।।

कम शाहबाज स्वंदर तु बैयि ग्वंदर ।

ज़ालु लँग्यमुत्य छि हूरु मस्तूरय लो लो ।।

बौज्य गौरी नाज कम छुख चु हावान ।

बाज अनुहथ साजु संतूरय लो लो ।।

‘सास भास्कर’ छु पूरिपूर नेत्य चमकान ।

तमि नूर दोद कोहितूरय लो लो ।।



मधुसूदन श्वदु द्वद चूरय लो लो

मधुसूदन श्वदु द्वद चूरय लो लो ।

ख्वनि ललवथ करय बु गूर गूरय लो लो ।।

मनु मोहनु वनि कुनि कनि यिखना ।

म्वनि वन्दहौय नन्दु किशोरय लो लो ।।

प्राण अपान अर्गु बर्गु पूज करुहय ।

अहंकार जालु दीप कोफूरय लो लो ।।

प्रंग वथरय मन्क्यन रंगु रवुकन ।

तन बु नावय कौंगु कोस्तूरय लो लो ।।

नालु रटुहथ अज सोन सालु यिखना ।

मालु गंडुहय रुतनु हौंजूरय लो लो ।।

कुकिलु वनुवान वनुवनु गोविंदु गू ।

होशु पोशु नूल प्रेमु कोसतूरय लो लो ।।

प्रेम साजुच आवाज नादु ब्यंद तार ।

दर्द सोजुक बोज संतूरय लो लो ।।

दार अवतार भूमि वाल पापुन बार ।

मुह कनसस कर चूर चूरय लो लो ॥

ही यावुनन्य श्रावनु आयि फवलनस ।

गु गु चानि प्रेम बोम्बूरय लो लो ॥

हूर वनवान च़ेय पतु नूर बैरिथुय ।

मचु मसतानु च़ेशमु मखमूरय लो लो ॥

नॉल्य वनुमाल हटि त्रोट्य तु कोस्तभ मन ।

शोरि मुकटु वॉल्य कनुदूरय लो लो ॥

सतुकुय रास अथु रठ च़ठ मु अथुवास ।

‘सास भास्कर’ बास पूर पूरय लो लो ॥

वनतु पोश नूल ओश यीनाये

वनतु पोश नूल ओश यीनाये ।

रोश कति रूद छाये वन ॥

होशि वॅजिस तॅम्य सुंज़ि माये, जोशि तमि दरियाव चमन ।

पोशु कोत यिम छि लॉनिन्य न्याये, रोशु कति रूद छाये वन ॥

सोलु सिंगार लोलु पॉरुनाये, द्रुय चॉन्य छम नावु ही तन ।

शाह परवुय तोर वुफुनाये, रोशु कति रूद छाये वन ॥

क्वंगु रंग गोमु रंगु रिबुनाये, प्रंग वथुरोस रंगु रवुकन ।

संग दिल क्या सु बेपरवाये, रोशु कति रूद छाये वन ॥

रूशिथ गोम अनोन सुलु नाये, ल्वलि मंजुल वॅरिथ ललुवोन ।
 न्यन्दि होत यँदुर न्यन्दि वुजुनाये, रोशु कति रूद छाये वन ॥
 गॅयस बेदार रूदुम छाये, दारि ओश वसान छुम नु तथ छ्यन ।
 आलमि आब तवु गछिनाये, रोशु कति रूद छाये वन ॥
 सुलि द्रायस तॅमि सुंजि माये, ब्रम द्युतनम मंज गामन ।
 पिलु कोर तौत वेलु बोजु नाये, रोशु कति रूद छाये वन ॥
 स्वंजु पौरुहस च्वंजु तय दाये, नीलु नागय छुस बु ज़ागन ।
 दूरि कॉफिल द्वह गछि छाये, रोशु कति रूद छाये वन ॥
 बॉल्य अनतने रूद कथ शाये, कॉल्य मा दूरि यूर्य अनतन ।
 बालि बालु पान कोरनम ज़ाये, रोशु कति रूद छाये वन ॥
 गहान शेश तु रव गाह वुछनाये, गाह छु आकाश गाह पातालन ।
 'सास भास्कर' गाह तेलुनाये, रोशु कति रूद छाये वन ॥



यनु छ्यनु गोख तनु छसयो बु थारन

यनु छ्यनु गोख तनु छसयो बु थारन ।

छसयो प्रारन द्यवु यूर्य यिये ॥

पतु लारन यिमन शाह सवारन, हमसु पखवुय वुफन गॅये ।

पर लूसिम कर छस प्रारन, छसयो प्रारन द्यवु यूर्य यिये ॥

कुत्य तंबुलॉव्य येम्य समसारन, आय कति सनु कोर कुन गॅये ।

जाय वुछनय चाय अंद मज़ारन, छसयो प्रारन द्यवु यूर्य यिये ॥

वेस्य गिन्दुहव नबुचन तारन, लोलु नारन वस मे ज़ॉज्ये ।
 रोबु खानु प्यठु पोत ज़ूनि छारन, छसयो प्रारन द्यवु यूर्य यिये ॥
 रुमु रुमु तोसु लूसस चारन, ओमकारुन पन मे खोरमये ।
 प्राण शुमरिथ द्यान छसयो बु धारन, छसयो प्रारन द्यवु यूर्य यिये ॥
 नॉग्यराय ज़न डुंग दिथ छारन, छॉग्य वालन ज़ागि ज़ागुये ।
 आगरु प्यठु सागर प्यारन, छसयो प्रारन द्यवु यूर्य यिये ॥
 लोलु तोदंरस अँदरी संदारन, जामु स्वर्गुक्य स्वंदर मे पुर्यमये ।
 तमि नारु नूर लल छस बु हारन, छसयो प्रारन द्यवु यूर्य यिये ॥
 शवन ज़ॉलिथ शेश तु रव कारण, शेश कलि हुन्द शोहजार छुये ।
 तमि गाशु लय त्रनवय कारण, छसयो प्रारन द्यवु यूर्य यिये ॥
 तथ कुनिरस क्या सन्यर व्यचारन, सनि खोतु सँन्य वँन्य मे दित्यमये ।
 आकाशु प्यठु पाताल प्यारन, छसयो प्रारन द्यवु यूर्य यिये ॥
 खाम सोदा प्वखतु बाज़ारन, यावुनुन म्वखतु म्वलु वोलुये ।
 कम शाहबाज़ बाज़ गँयि हारन, छसयो प्रारन द्यवु यूर्य यिये ॥
 'सास भास्कर' नोन छु गाश दारन, रातु क्रीलन अनिगटु छेये ।
 गाटु गाटस गटि गाश गारन, छसयो प्रारन द्यवु यूर्य यिये ॥



पथ वन कोर विगिन्यव रोव

पथ वन कोर विगिन्यव रोव ।

पोरयि कुकिलव गोविंदू गू ।।

स्वर्गु अछु रछु व्वछु लोलु हनु, गोकुलु मनु गँयि नचनस ।

स्वय रचना नारदन ग्यँव, पोरयि कुकिलव गोविंदू गू ।।

ती रेशुनय गव कनुनय, मनु सरु लँग्य अन पुरुने,

लोलु नारु सूर मोलुख तनुनय, वनुनय चाय दान स्वरने ।

अहम त्रोवुख पोरुख ओम सू, पोरयि कुकिलव गोविंदू गू ।।

वुजान यिमनय छु दुर्दुक शोक, चाँटिथ सथ पुर्द दामु दँरियाव चोख,

अनुग्रह आलव तोरय गोख, यीजो यीवो छुन केह रोक ।

दय टोठ्योख जय जय छू, पोरयि कुकिलव गोविंदू गू ।।

कँरिथ प्रथ काँसि सुत्य अथुवास, गिंदान नेत्य गूपियन सुत्य रास,

छु रुमु रुमु शामु स्वंदर सास, बहन सासन योगन छुन भास ।

विश्वास कोर ज़न गछान अख च्यूह, पोरयि कुकिलव गोविंदू गू ।।

बन्योमुत ब्रज छु वैकुण्ठ द्वार, नमान तति सिरयि चँद्रमु तार,

समान वृच गूपियन मिलचार, दमान दमु दमु छु लोलुक नार ।

सु व्यवहार वनतु कथ क्या ह्यू, पोरयि कुकिलव गोविंदू गू ।।

सिरयि चंद्रमु गोमुत मिलचार, नैमिथ दीवी दीव यकबार,
सैमिथ फॅल्यमुत्य छि गुल तु गुलजार, अंमबर हारान बौबर जानुवार ।
परान श्री कृष्ण कृष्ण गू गू, पोरयि कुकिलव गोविंदु गू ॥

छु कर केंह भास खास चिन्मय, असान रसमय वसान तनुमय,
मशित पर तु पान गोमुत लय, सु 'भास्कर सास' तति व्वदय ।
छु तेलान अँदुर न्यबरय सूः, पोरयि कुकिलव गोविंदु गू ॥



रोश रोश ओश म्योन यूर्य अनतन

रोशु रोशु ओश म्योन यूर्य अनतन,
बरुहस पोशु तोन यूर्य अनतन ।
बालु गूपाल श्री नन्दु नंदन ॥

शामु रूप दारुवुन यूर्य अनतन ॥० ॥

द्वारिकायि छा किनु मथुराये,
व्वथुरोस वति पान जायि जाये ।
मायि स्वर वायि वुन यूर्य अनतन ॥
बरुहस पोशु तोन यूर्य अनतन ॥० ॥

बॉल्य बालु पान तस पतु रोवुम,
द्वह गोम बॉल्य वुड़ालु प्रोवुम ।
लालु छालु मारुवुन यूर्य अनतन ॥
बरुहस पोशु तोन यूर्य अनतन ॥० ॥

बॉल्य अनतने कॉल्य मा दूरे,
थनि चूर सोन कति सनु रूद चूरे ।
गोसु मा गोस म्योन यूर्य अनतन ॥
बरुहस पोशु तोन यूर्य अनतन ॥० ॥

सॅमिवी सॅखियव खेलव रास,
अथुवास करि वरि करि सोन पास ।
काचु जूनि चलि गुहुन यूर्य अनतन ॥
बरुहस पोशु तोन यूर्य अनतन ॥० ॥

कृष्ण कृष्ण कॅरिथुय लायोस नाद,
राधा कृष्ण बोझि सोन पॅर्ययाद ।
याद पेयस वादु प्रोन यूर्य अनतन ॥
बरुहस पोशु तोन यूर्य अनतन ॥० ॥ ✓

गोपालसु सॅनियास लागोस,
पातालु नागबलु ज़ागि ज़ागोस ।
ल्वलि मंज ललुवोन यूर्य अनतन ॥
बरुहस पोशु तोन यूर्य अनतन ॥० ॥ ✓

अन्दिहे न्याय कासि बन्धन,
व्बंदि मंज बासि देवकी नंदन ।
वंदुसुय कॅबीलु क्रोन यूर्य अनतन ॥
बरुहस पोशु तोन यूर्य अनतन ॥० ॥ -

दतु गॅयम तस पतु वतु गारान,
हतु ततु सुय छुम नतु मारु पान ।

मतना सु मोत सोन यूरय अनतन ॥

बरुहस पोशु तोन यूरय अनतन ॥० ॥

लोलुर व्वंदुकुय सीर बावोस,

नरि आलवान लरि पान सावोस ।

लोल आम बाँबुरुन यूरय अनतन ॥

बरुहस पोशु तोन यूरय अनतन ॥० ॥

शेश तु रव नेशु दिन ननि ख्वतु नोन,

हिशु रोस कीशव रास खेलुवुन ।

‘भास्कर सास’ गुन यूरय अनतन ॥

बरुहस पोशु तोन यूरय अनतन ॥० ॥



कसवनु ज़ीरु बम सीर ओसमय

कसवनु ज़ीरु बम सीर ओसमय ।

हम सू रुमु रुमु छस ललवान ॥

शमुदमु धारनायि दान दोरु मय,

प्रुच प्यथ व्वेच्च गूपी वखुनान ।

राधा कृष्ण कृष्ण वाद चोर मय ॥

हम सू रुमु रुमु छस ललवान ॥० ॥

गनुपतयारु चे नावि ब्यूठ मय,

शुराह यार शिव पूर्य फ्युर व्वलसान ।

शाह पर लूसिम तु गाह ड्यूठमय ॥

हम सू रुमु रुमु छस ललुवान ॥० ॥

नपु नपु करवुन छ्यपु द्योवमय,

दोपहम केवल पनुनुय पान ।

वुफु कोर छेपि छारि वुफुनोवमय ॥

हम सू रुमु रुमु छस ललुवान ॥० ॥

पवनुकि नारु सुत्य पान तोवुमय,

दजुवनि शाहपर करनस मान ।

शेष्य कलु जलु रसु शेहलोवमय ॥

हम सू रुमु रुमु छस ललुवान ॥० ॥

सतिये सतुसोस तोसु चोरमय,

बालु पान द्रायस गोलुम पान ।

दम दिथ ओमकुय पन खोरमय ॥

हम सू रुमु रुमु छस ललुवान ॥० ॥

लोलु नारु मंज वारु पान ज़ोलमय,

सीतायि मायि ज़न नाज़नीन पान ।

कलि गॅयम हॅज कॉर मल गोलमय ॥

हम सू रुमु रुमु छस ललुवान ॥० ॥

कोनु कोनु क्वनु यियि म्वनि लोसमय,

रवनि मुचरिथ छ्वन्य छुमनु बासान ।

कोत गव दय येत्य वुन्य ओसमय ॥

हम सू रुमु रुमु छस ललुवान ॥० ॥

गोपालस सॅनियास लोगुमय,
सास तनि पूरुम व्वलास शूबि सान ।
पाताल नागुबलु ज़ागि ज़ोगुमय ॥
हम सू रुमु रुमु छस ललुवान ॥० ॥

पर तु पान मॅशिरिथ स्वर गूनुमय,
ल्वलि ज़न ललुवुन सुय ललुवान ।
नंगु पान नचुनस रँग ज़ोनुमय ॥
हम सू रुमु रुमु छस ललुवान ॥० ॥

दशु नादु मुरली वाद बूजमय,
हिशि रोस कीशव निशि ज़ान पान ।
राधिका श्वद्व व्वद मै तूरय सूजमय ॥
हम सू रुमु रुमु छस ललुवान ॥० ॥

ज़ागरत स्वपुन आदि अंत ओसमय,
मंथ्यानच संद नादु ब्यंद ज़ान ।
'सास भास्कर' व्यकास बोसुमय ॥
हम सू रुमु रुमु छस ललुवान ॥० ॥



ग्यान दिम पान हाव रटतो नालो

ग्यान दिम पान हाव रटथो नालो, शामु रूपु रामु दयालो वे ।
 गथ दिम पथ रछुम सत श्री अकालो, शामु रूपु रामु दयालो वे ॥
 सत् ग्वरु पादन वंदुहय कपालो, सत् च्यथ आनंद निरालो वे ।
 गणपति सत सेंती हुंदि द्वार पालो, शामु रूपु रामु दयालो वे ॥
 दासन पास कर दीनु दयालो, सास रवु भास न्यरमालो वे ।
 ईश्वर महीश्वर सर्वु रक्षुपालो, शामु रूपु रामु दयालो वे ॥
 पिलु कोत द्वह दरि गव संगर मालो, बालु पान छुम छ्वटन बालो वे ।
 आय आम सोरान छेत्य गॅयम बालो, शामु रूपु रामु दयालो वे ॥
 पीतांबर दरु अंबर दुशालो, मोर मुकट चूनी लालो वे ।
 शेरुहय तु पोरुहय भक्ति म्वखतु मालो, शामु रूपु रामु दयालो वे ॥
 खीर खंड नाबद बरुहय थालो, सालु वलु त्रिजगत पालो वे ।
 डालु मतु दितु व्वन्य मो रठ मलालो, शामु रूपु रामु दयालो वे ॥
 दूर्यु सूर गोम कोता चालो, रेह नेरि फॅटिथुय पातालो वे ।
 आर छुय नु वार छुम नु नारु पान जालो, शामु रूपु रामु दयालो वे ॥
 भवसरु आवुलुनि येमि जंजालो, तार दिम बडि कृपालो वे ।
 सेर गोस नेर नोन मो मार छालो, शामु रूपु रामु दयालो वे ॥
 प्रथ कालु पथ रछ येमि कलि कालो, रुति फालु हाव स्वकालो वे ।
 कॉल्य कालु नेर नोन मुह मद गालो, शामु रूपु रामु दयालो वे ॥
 ग्यानुक प्याल् चाव माला मालो, द्यानुक दीप प्रजलावो वे ।
 मस चथ रसु रसु बन मतवालो, शामु रूपु रामु दयालो वे ॥

सतुची तरवार ह्यथ च प्रेति षालो, दुष्ट द्वर्जन असत गालो वे ।
जय जय दिग् विजय जग संबालो, शामु रूपु रामु दयालो वे ॥
यँच काल गव व्वन्य प्रारु कूत कालो, हारान अशिने चालो वे ।
'सास भास्कर' छुय दिवान प्रेमु नालो, शामु रूपु रामु दयालो वे ॥



व्वंदु यँदु रव मन फवलनॉविथ

व्वंदु इन्दु रव मन फवलनॉविथ ।

प्रजुनॉविथ कोर सनु गव ॥

राज इंदुर गव छँद्रॉविथ, दिह मंदिर ज़न परमु शिव ।
शामु सुन्दर न्यन्द्र पॉविथ, प्रजुनॉविथ कोर सनु गव ॥
शामु प्रभात अथ मिलु नॉविथ, मंथ्यानुच संद बासान ।
सोपुन ज़ागरत विप्नु श्रोपरॉविथ, प्रजुनॉविथ कोर सनु गव ॥
निर्वासन रास खेलुनॉविथ, शक्ति पातुक भक्ति प्रभाव ।
प्वखतु कारन मुक्ति द्यॉविथ, प्रजुनॉविथ कोर सनु गव ॥
शुन्य नादु ब्यंद शिव बोलु नॉविथ, दासु स्वाँमी भाव कॅरिथ अथुवास ।
बासु अवबासु खय कासुनॉविथ, प्रजुनॉविथ कोर सनु गव ॥
न्यन्दि हचुनय मन तंबुलाविथ, न्यथु ननि ननि द्रायि बाज़ार ।
तनु, मनु, धनु, गरुबार त्रॉविथ, प्रजुनॉविथ कोर सनु गव ॥
ज्यव नारु सुत्य वारु छलुनॉविथ, गव तति तोर कॅह नतु क्याह ।
अँछव बूजुन कनव वुछुनॉविथ, प्रजुनॉविथ कोर सनु गव ॥

रूशिथ गव अनोन सुलुनॉविथ, ल्वलि मंजुलि ल्वल्य ल्वल्य करोस ।
 चूरि थावोन कस ह्यकोन हॉविथ, प्रज़ुनॉविथ कोर सनु गव ।।
 रिंदु गिंदुना छु समसार हॉविथ, जिंदु मरुनुय व्वंदि चलि खय ।
 रिंदु पानय द्वंद भाव त्रॉविथ, प्रज़ुनॉविथ कोर सनु गव ।।
 च्यथ विकास मन फवलुनॉविथ, सास आदित्य प्रज़लान रव ।
 श्वास उश्वास 'भास्कर' प्रॉविथ, प्रज़ुनॉविथ कोर सनु गव ।।



ओश छुम सुत्य सँतिये

ओश छुम सुत्य सँतिये ।
 तोश ना बोश दय आम ।।
 पोश वथुरोस फँतिये, रोशि मा रोज़्यम पाम ।
 ओश छुम सुत्य सँतिये ।।
 गिंदुनस गोमुतये, नंदु नंदन निष्काम ।
 यंद्रव व्वंदु फोलमुतये, मध्यानुच संद सुबह शाम ।।
 ओश छुम सुत्य सँतिये ।।
 वूँच म्यानि गूरय बायि सँतिये, छंद्रेमचु सथ काम ।
 न्यन्द्रि हचु प्रारान तँतिये, स्वंदर ह्यथ थनि जाम ।।
 ओश छुम सुत्य सँतिये ।।
 सु त्वतुनस आरुवूँतिये, धारुनायि प्राणायाम ।
 श्वास उश्वास मू दँतिये, व्यास नारद सुदाम ।।
 ओश छुम सुत्य सँतिये ।।

फेरोस ब्रोंठ पॅतिये, नेरोस लोलु दय आम ।
करु होस नालु मॅतिये, बालु पानय तमना द्राम ॥

ओश छुम सुत्य सॅतिये ॥

केंह रेश्य छि मसतानु मॅतिये, केचन पंथ दूर्याम ।
केंह रेश्य छि मंदु छेमतिये, केचन प्वखतु गव खाम ॥

ओश छुम सुत्य सॅतिये ॥

बालु पानु केंह छि द्रामतिये, कॉल्य कालु लबन विश्राम ।
रिंदु वुछतु ज़िंदु प्रापॅतिये, रुमु रुमु शाम रुप सु राम ॥

ओश छुम सुत्य सॅतिये ॥

मुरली शब्दु बैरिमतिये, रसु रसु ह्यसु व्यसुर्याम ।
लय वुछिथ पय आम तॅतिये, अनहत शब्दु पैगाम ॥

ओश छुम सुत्य सॅतिये ॥

शोष्य कलि ज़लु सॅगिमतिये, निश्कलु व्वंद शौहल्याम ।
कलि काल गॅयम सुमॅतिये, तलु प्यठ ती म्वलुव्याम ॥

ओश छुम सुत्य सॅतिये ॥

कारण छि लय गॉमतिये, गंदरव ग्यवान स्वर साम ।
सुतोतुनस पानु सरुस्वतिये, सिद्ध मार्ग व्वलग्याम ॥

ओश छुम सुत्य सॅतिये ॥

शाह पर छि तति दॅदिमतिये, वनुनस ज़यव गॅयि थाम ।
द्वादश द्वार उदमॅतिये, अख तु नव तति बास्याम ॥

ओश छुम सुत्य सॅतिये ॥

बास छुमनु रास ख्यूल मुतये, 'सास भास्कर' प्रज़ल्याम ।
शवास उश्वास ईकु स्तिथिये, शांत, तीज़, बीज़ प्रखट्याम ॥

ओश छुम सुत्य सॅतिये ॥

रुमु रुमु श्यामाकार

रुमु रुमु श्यामाकार ।

छांडोन बिद्रांबन तु लो ॥

नादु ब्यंद तीजु ओमकार, माधव नंदु नंदन तु लो ।

रुमु रुमु श्यामाकार ॥

मनु मथुरायि आधार, व्वथुरोस मंजु नेत्रन तु लो ।

अतु गतु जन्मु जन्मु बार, सतु किन्य लागि तथ छ्यन तु लो ॥

रुमु रुमु श्यामाकार ॥

द्वारिकायि हुंद सु सरदार, छांडोन मंजु तारुकन तु लो ।

हरु म्वखु छा हरदुवार, नेरोस मंजु मार्कन तु लो ॥

रुमु रुमु श्यामाकार ॥

गोकुल कुय गुल बहार, गोपाल सुत्य गूपियन तु लो ।

गोवर्धन गिरिद्वार, ननि नोन सु शाम शामन तु लो ॥

रुमु रुमु श्यामाकार ॥

थनि चूर ह्यथ गूरय यार, लूटान गूरय बायन तु लो ।

द्वदु लोटु अमर्यत दार, चावान सुत्य बाजन तु लो ॥

रुमु रुमु श्यामाकार ॥

कनुसुन कालु समहार, हमसू ओम जपन तु लो ।

नादु व्यंद जीरु बंम साज, साधना छन व्यपन तु लो ॥

रुमु रुमु श्यामाकार ॥

यि छु तावुन बाज़ार, श्रावुन तोतु कलन तु लो ।
यावुन ब्रम बाँज्य गार, काँल्य यिम दाँद्य बलन तु लो ॥

रुमु रुमु श्यामाकार ॥

सँमिवी शक्ति बाज़ार, भक्ति म्वखतु म्वलुवन तु लो ।
खाम सोदा प्वखतु कार, सु दाम ल्वलि ललुवन तु लो ॥

रुमु रुमु श्यामाकार ॥

मोर मुकट शूबिदार, गटि मंज सिरिय प्रज़लन तु लो ।
हटि त्रेट्य मालु शूबिदार, बाँल्य छिस बाँल्य कनन तु लो ॥

रुमु रुमु श्यामाकार ॥

शाम पीताम्बर दार, अंबर मँलिथ चंदन तु लो ।
गमबर तीज़ु अंबर, असुवुन क्या सु प्रसन्न तु लो ॥

रुमु रुमु श्यामाकार ॥

रुवनि ग्वड क्या श्रोनिदार, नचुनस गछन श्रोन्त्य श्रोन्त्य तु लो ।
माँज़ि नम चँदुरमु तार, मन डोल अछु रछन तु लो ॥

रुमु रुमु श्यामाकार ॥

बनसँरी वादु व्यसतार, संसार सोर व्यसरन तु लो ।
लोलु दिथ गोलु आकार, नचुनस क्या प्रसन तु लो ॥

रुमु रुमु श्यामाकार ॥

‘सास भास्करु’ तीज़ु दार, चमकान मंज दासन तु लो ।
रासु अथवास प्रखचार, विकास नोन बासन तु लो ॥

रुमु रुमु श्यामाकार ॥



व्यकुन्ठ द्वार बिन्द्रावन तु लो लो

व्यकुन्ठ द्वार बिन्द्रावन तु लो लो ।

शामा कार नंदु नंदन तु लो लो ॥

व्वंदु यन्दु रव मन फवलुनॉविथ,

निष्कलु मन शशिकल दाम चॉविथ ।

ज़ीरु बमकुय आबि ज़म ज़म छॉविथ ।

नादु ब्यंदु योगु निद्रायि सॉविथ ॥

प्रॉविथ थान स्यद आसन तु लोलो ।

शामा कार नंदु नंदन तु लोलो ॥० ॥

दीव दीवी सॉरी शरणे आये,

वरि योद दातु करि सुय सोनुय पाये ।

मायि वोलमुत रासुक छुख अभिप्राये,

नालु रटुहोन बालु पानु क्या छु परवाये ॥

रूप गूपियन हुन्द छु दारन तु लोलो,

शामा कार नंदु नंदन तु लोलो ॥० ॥

वनुकी कुल जानवार बैयि आबशार,

वैछ्य गाँव शुर्य पोशु अंबार ।

कृष्ण बोलान वसुनस लोलु अँशुदार,

तनमय द्यान मोत्रिथ तद आकार ॥

शामु स्वंदर मुरली बजावन तु लोलो,

शामा कार नंदु नंदन तु लोलो ॥० ॥

कर्मु फल दातु धर्मुक नोन सु अवतार,
 सारादिसार द्वारिकायि हुंद सु सरदार ।
 हमसु नादय कनसुन कालु शाहमार,
 बालु गूपाल स्वंदर गिरिवर दार ॥
 भार जगतुक वारु कासन तु लोलो,
 शामा कार नंदु नंदन तु लोलो ॥० ॥

गोपाल सुय गोकुलकुय गुल बहार,
 मॅल्य ह्यमुहन छिम कति म्वखतु तय द्वार ।
 सीनु मुन्नरिथ वनुहौस वीलु तय जार,
 नीलु नागस ज़ागुहौस प्यठ हमसु द्वार ॥
 मुखतु गछु हव शुभ दर्शुन तु लोलो,
 शामा कार नंदु नंदन तु लोलो ॥० ॥

गूर करुहोस ल्वलि मंज सुय ललुनावोन,
 दूर गरु होस जिगरस मंज सावोन ।
 चूरि प्रेमुक द्वद गलि गलि चावोन,
 मनु वाजि प्यठ सुय नाव खनुनावोन ॥
 रोज़ि अरमान स्वर्गु हूरन तु लोलो,
 शामा कार नंदु नंदन तु लोलो ॥० ॥

आदन बाजि प्रारान वादु सोन सूर,
 ज़गतुकि राजि लोलु नारु गव ना सूर ।
 यूगियन हुंदि ताजदारु मो ह्यम दूर,
 अँदरु नैबरय सु प्रकाश भास पूरि पूर ॥
 थनि चूर सानि मनु मोहनु तु लोलो,
 शामा कार नंदु नंदन तु लोलो ॥० ॥

तिथि संवादु पाताल बैयि आकाश,
 बरनु आमृत हेरि ब्वनु शब्द प्रकाश ।
 सु प्रकाशय ननि नोन चित् आकाश,
 सु अनुभव गमि तेलान शांत प्रकाश ॥
 'सास भास्कर' ज़न नोन प्रज़लन तु लोलो,
 शामा कार नंदु नंदन तु लोलो ॥०॥



नंदनंदन गोमय बिंद्राबन गिंदौने

नंदनंदन गोमय बिंद्राबन गिंदौने
 नंदनंदन गोमय बिंद्राबन गिंदौने ॥

मधुसूदन गोमय वध राखिसन करौने,
 स्यदु साधन गोमय बिंद्राबन गिंदौने ।
 नंदनंदन गोमय बिंद्राबन गिंदौने ॥

सुत्य गूपियन गोमय हीतु हीतु प्रीत बरौने,
 गीत ग्वंदन गोमय बिंद्राबन गिंदौने ।
 नंदनंदन गोमय बिंद्राबन गिंदौने ॥

नंदन वन गोमय दीवन न्याय अंदौने,
 आनंद घन गोमय बिंद्राबन गिंदौने ।
 नंदनंदन गोमय बिंद्राबन गिंदौने ॥

गूरय बालकन गोमय न्यूर दूर गाँव रछौने,
ह्यथ गोवर्धन गोमय बिंद्राबन गिंदौने ।
नंदनदन गोमय बिंद्राबन गिंदौने ॥

कामु दीनन गोमय शामु स्वंदर पालु ने,
पामु थवुने गोमय बिंद्राबन गिंदौने ।
नंदनदन गोमय बिंद्राबन गिंदौने ॥

तन नाँविथ गोमय वन फलुमूल चटौने,
लूट ह्यथ मन गोमय बिंद्राबन गिंदौने ।
नंदनदन गोमय बिंद्राबन गिंदौने ॥

सिरियु ज़ोतन गोमय वीर्यु वान पान हावने,
म्वख फवलुवुन गोमय बिंद्राबन गिंदौने ।
नंदनदन गोमय बिंद्राबन गिंदौने ॥

परि पूरन गोमय ग्रायि दूरन छु मारौने,
मायि मोहनगोमय बिंद्राबन गिंदौने ।
नंदनदन गोमय बिंद्राबन गिंदौने ॥

आरुवलन गोमै खारु जिगरस छु थावने,
नार न्यंगलन गोमय बिंद्राबन गिंदौने ।
नंदनदन गोमय बिंद्राबन गिंदौने ॥

स्वर्गायन गोमय स्वर असुरन छु मोहने,
मन व्यसुरन गोमय बिंद्राबन गिंदौने ।
नंदनदन गोमय बिंद्राबन गिंदौने ॥

गूरय बायन गोमय चूरि द्वद थॅन्य छु ख्यवाँने,
न्यूर गाँवन गोमय बिंद्राबन गिंदौने ।

नंदुनदन गोमय बिंद्राबन गिंदौने ।।

वृक्षभानुन गोमय वरि राधायि वराँने,

वर करान गोमय बिंद्राबन गिंदौने ।

नंदुनदन गोमय बिंद्राबन गिंदौने ।।

म्वखतु ववुनि गोमय प्वखतुकार ती छु लोनने,

भक्ति रक्षन गोमय बिंद्राबन गिंदौने ।

नंदुनदन गोमय बिंद्राबन गिंदौने ।।

रास खेलुनि गोमय 'सास भास्कर' छु प्वलौने,

निर्वासन गोमय बिंद्राबन गिंदौने ।

नंदुनदन गोमय बिंद्राबन गिंदौने ।।



शामु स्वंदर दर्शुन दियिना

शामु स्वंदर दर्शुन दियिना ।

हा उधव वनतो बेयि यियिना ।।

ज्ञानुक ताज शेरि दिथ सु महाराज,

युधिष्टर नोन नेरि जगनुक ताज ।

पालनस कर्म वीद त्रैयि यियिना ।।

हा उधव वनतो बेयि यियिना ।।० ।।

अर्जुन ज्ञानुक अस्त्र ह्यथ,
 दुर्जन गालुवुन ब्रोंठ तय पथ ।
 गीतायि न्यरुनय बैयि यियिना ॥
 हा उधव वनतो बैयि यियिना ॥० ॥

मुंह मद कंसासुर काम कूध,
 पूतना वासना गछि नाबूद ।
 म्वकुलावि बोज़ देवकी यियिना ॥
 हा उधव वनतो बैयि यियिना ॥० ॥

वृँच गूपी वँछ्य गॉव पालनस,
 रंगु रंगु राक्षसन ब्योल गालनस ।
 ऑरत्यन कासुनि भयि यियिना ॥
 हा उधव वनतो बैयि यियिना ॥० ॥

पनु पहरि द्वारिका बनि तत्क्षन,
 गारि युस नारस बनि गुलशन ।
 बालु यार सुदामय बैयि यियिना ॥
 हा उधव वनतो बैयि यियिना ॥० ॥

थमु मंजु ओतार नरसिंह रूप,
 दॉरिथ राक्षसन यँच गव कूप ।
 प्रह्लादुनि मालयवयि यियिना ॥
 हा उधव वनतो बैयि यियिना ॥० ॥

श्रद्धायि अहल्यायि पाप गछि दूर,
 अहंकार रावनस लंकायि सूर ।

रुमु रुमु राम रमा यियिना ॥

हा उधव वनतो बेयि यियिना ॥० ॥

नारु पान ज़ालव मटि छुस मार,
अमार तँमि सुंदि अँस्य छि बेमार ।

मारुमोत सोन वारु लयि यियिना ॥

हा उधव वनतो बेयि यियिना ॥० ॥

ल्वलि मंजु बाग सुय ललुनावोन,

चूरि थावोन काँसि कर हावोन ।

वाँन्स सूर तँमि सुंजि प्रेयि यियिना ॥

हा उधव वनतो बेयि यियिना ॥० ॥

वादु सूर कोनु आव यीच क्या छि तौर,
फिर्य फिर्य कँज तमि हँज गँयि कौर ।

गोसु क्या गोस लोसु लुयि यियिना ॥

हा उधव वनतो बेयि यियिना ॥० ॥

मेत्रस नेत्रन मंज वथुरोस,

क्वंगु कोफूर मुशकु तन नावोस ।

अँर्यनि रंग गोमुत छु हियि यियिना ॥

हा उधव वनतो बेयि यियिना ॥० ॥

बुध रूप बुध देव शुद्ध सत् च्यथ,

वुज्जनावि जगतस फेरि करि ह्यत ।

सारु रूप पानु गारगी यियिना ॥

हा उधव वनतो बेयि यियिना ॥० ॥

ज़ॉल्य पंजर जानावार चलन,
कॉल्य मा बोलन तोतु कलन।
अदु कर हरदु ज़रदी यियिना॥

हा उधव वनतो बेयि यियिना॥०॥

सत्ची बुतराँच कासवुन व्याद,
प्रथ दीशि बासि नोन धर्मु संवाद।
पथ रछनि सँती द्रोपदी यियिना॥
हा उधव वनतो बेयि यियिना॥०॥

भवसरु अग्यानु क्रिमुनय कोर,
बंदकोर गजेन्दरस लोग शोशदर।
हरीहर वरदा बेयि यियिना॥

हा उधव वनतो बेयि यियिना॥०॥

तस दिन न्यशु दिन छु कैह बास,
मचु गॉमचु लोलु हच उदास।
ऑम्य ज़ॉम्य प्यालु खेनि चेनि यियिना॥
हा उधव वनतो बेयि यियिना॥०॥

वेलु वोत मेलनुक खेलव रास,
अथवासु वरि करि सोनुय पास।
'भास्करु' वनतु आश्चर्य यियिना॥

हा उधव वनतो बेयि यियिना॥०॥



द्वह दरि गोम तूरय पतु लारय

द्वह दरि गोम तूरय पतु लारय ।

आरुवलु नतु मारय पान ।।

द्वारिकायि छा किनु मथुराये, वति वथुरय पान पादन ।
 नेत्रन छम अशुने दारय, आरुवलु नतु मारय पान ।।
 म्वनि व्वंदुहय बंदन कासतम, व्वंदि बासतम अंदनम न्याय ।
 नंदु नंदन यितु दुबारय, आरुवलु नतु मारय पान ।।
 सालु यिखना नॉल्य पॉरावय, भक्ति म्वखतु मालु नॉल्य कनुदूर ।
 कॉल्य कालु मारि अदु ल्वकचारय, आरुवलु नतु मारय पान ।।
 ज़गि हुंदि राजु महाराजय, आदन बाजे बोज़ फॅर्ययाद ।
 यूगियन हुंदि ताजदारय, आरुवलु नतु मारय पान ।।
 लोलु वॉनी नादा लायै, पोशुनूल ज़न गेवि कृष्णु गीत ।
 साज़ संतूर राग सेतारय, आरुवलु नतु मारय पान ।।
 मान अवमानु निशि रूद न्यारय, ध्यानु चाने रॉग तिमव तन मन ।
 गरु बार गोख वैकुण्ठ दारय, आरुवलु नतु मारय पान ।।
 हिशुरस ति ईशु द्वार औतारय, निशु बास कास व्वन्य अग्यान ।
 रैश्य केशान डेशुहोन वारय, आरुवलु नतु मारय पान ।।
 मंज़ मारकन वॅन्य दिनि नेरय, ज़ूनि छांडथ मंज़ तारकन ।
 'सास भास्करु' तीज़ दारय, आरुवलु नतु मारय पान ।।



च्यथ विकास रास अथुवासु प्रेम वादु

च्यथ विकास रास अथुवासु प्रेम वादु ।

लोलु बन्सरी नादा राधा कृष्ण परयो ॥

शांत तीजु आकार नादु ब्यंद ओमकार,

साधानायि अर्धु नादा राधा कृष्ण परयो ।

लोलु बन्सरी नादा राधा कृष्ण परयो ॥

कनसुन समहार हम सू निर्विकार,

संसारु कास व्याधा राधा कृष्ण परयो ।

लोलु बन्सरी नादा राधा कृष्ण परयो ॥

राजु योगु अनहत बाजि सू हम सू,

गू गू कुकिलि नादा राधा कृष्ण परयो ।

लोलु बन्सरी नादा राधा कृष्ण परयो ॥

होशु कृष्ण कृष्ण गीत वनु वॅन्य दिमयो,

जोशु पोशु नूलु संवादा राधा कृष्ण परयो ।

लोलु बन्सरी नादा राधा कृष्ण परयो ॥

वथुरोस नेत्रन मंज मथुराये,

प्रेमु मायि अहलादा राधा कृष्ण परयो ।

लोलु बन्सरी नादा राधा कृष्ण परयो ॥

स्वर्गुचि अछु रछु वछु नचुनस गॅयि मचु,

यावुनस ह्यतुख दादा राधा कृष्ण परयो ।

लोलु बन्सरी नादा राधा कृष्ण परयो ॥

गूपियन सन्वख सु सौरूप हर म्वखु,
स्वखु म्वखु प्रसादा राधा कृष्ण परयो ।
लोलु बन्सरी नादा राधा कृष्ण परयो ॥

नठ छि शाह परनुय दरि करि कुस मान,
अनुभव गुन वादा राधा कृष्ण परयो ।
लोलु बन्सरी नादा राधा कृष्ण परयो ॥

केशान रेश्य नेत्य डेशुहोन ननि नोन,
गूपियन छु धनिवादा राधा कृष्ण परयो ।
लोलु बन्सरी नादा राधा कृष्ण परयो ॥

पर तु पान मशुरिथ तस पतु भर लोल,
कॉल्य गछि वादु अदा राधा कृष्ण परयो ।
लोलु बन्सरी नादा राधा कृष्ण परयो ॥

शामु प्रभातु मेल खेल श्वासु उश्वासु,
'भास्कर' निरबाधा राधा कृष्ण परयो ।
लोलु बन्सरी नादा राधा कृष्ण परयो ॥



दर्शुन दियि यियि नाये

दर्शुन दियि यियि नाये,
न्यरनय नयिनय छाये,
नेत्रन अन्दर वथुरावोस,
ल्वलि ललुवोन लोलु माये,
यी वनतु थनि चूर सुय,
थनि लोटु ह्यथ गूर्य बाये,
वथुरोस वतन हीय अम्बरय,
प्रेयिवुनि परोस तोताये,
मथुरायि गोकुलु वॅन्य दिमोस,
पान आलु वोस मालाये,
न्यन्दि हचन लूटिथ सु गव,
नालु मति रटोन पालुनाये,
उधव च वनतस कोनु आव,
बॅखत्यन हंजि रक्षाये,
सनु वुन मनस बन्सॅरी नाद,
न्यन्दि हचु छॅद्रन आये,
गंधर्व दीवता स्यद साद,
प्रारान छि प्यठ जमनाये,
ग्वालु बालु वॅछ्य गॉव ह्यथ,
गूपी जल बरनि द्राये,
डॅशुनय योद मा क्रेशुनय,

कर सनु सोन कृष्ण राये ।
कर सनु सोन कृष्ण राये ॥
सीनु मुच्चरिथ कीनु भावोस ।
कर सनु सोन कृष्ण राये ॥
प्रारान छि तिम ह्यथ गुरसुय ।
कर सनु सोन कृष्ण राये ॥
लुयि लोसु तस क्या छु गम बरुय ।
कर सनु सोन कृष्ण राये ॥
जमुनायि बलु सॉरी समोस ।
कर सनु सोन कृष्ण राये ॥
बिंद्राबन वॅन्य वोन रटव ।
कर सनु सोन कृष्ण राये ॥
कति रूद व्यापक तस छु नाव ।
कर सनु सोन कृष्ण राये ॥
वनुवुन च्यतस पोवथस याद ।
कर सनु सोन कृष्ण राये ॥
नारद तु व्यास बेयि प्रेह्लाद ।
कर सनु सोन कृष्ण राये ॥
प्रारान छि सॉरी पॅच प्यथ ।
कर सनु सोन कृष्ण राये ॥
रॅशु रागु रोस वुठ फेशुनय ।

त्रेशु हचु मरन मा माये, कर सनु सोन कृष्ण राये ॥
ह्यस होश मॅशरिथ पर तु पान, तंबलेमचु पॅच प्यवान ।
वनु वनु वॅन्य दिनि द्राये, कर सनु सोन कृष्ण राये ॥
संवाद बूजिथ ज़ीरु बम, अज़पा ज़पु सोहम हम ।
ओम भूर भुवः धारुनाये, कर सनु सोन कृष्ण राये ॥
अथुवास कॅरिथुय बासि नोन, वासुदेव रास तति खेलुवुन ।
‘सास भास्कर’ शोभुनाये, कर सनु सोन कृष्ण राये ॥



म्वनि मंज़ ललुवथ कॅन्या लालो

म्वनि मंज़ ललुवथ कॅन्या लालो ।

भय हर बालु गोपालो वे ॥

गूपियन सुत्यन मारान छालो,

द्वख हर भक्ति रखिपालो वे ।

जनमु गटु कासतम कंसुनि कालो ॥

भय हर बालु गोपालो वे ॥०॥

भयि मंज़ कडतम दयि श्री अकालो,

रखि पालु हा कृपालो वे ।

प्रेम मसु बैरिमय मसकी प्यालो ॥

भय हर बालु गोपालो वे ॥०॥

दूरयर चोनुय कोताह बु चालो,

वलनु आस ज़न्मु ज़ालो वे ।

ज्ञान दुकारि बनि तथ परकालो ॥

भय हर बालु गोपालो वे ॥० ॥

खटतम मतु पान रठतम नालो,

आसतम चुय नॉली नालो वे ।

लूसुस प्रारु व्वन्य कोता कालो ॥

भय हर बालु गोपालो वे ॥० ॥

हारान वुछुथस अशिने चालो,

लालो छेत्य गॅयम बालो वे ।

बालि गोम बाल तय क्यहो संबालो ॥

भय हर बालु गोपालो वे ॥० ॥

द्वह आम सोरान छेत्य गॅयम बालो,

पलि कॅह पोवुम नु मालो वे ।

अथु छिम छैन्य तय छस बेहालो ॥

भय हर बालु गोपालो वे ॥० ॥

येलि बनि समयूग आसि कुस कालो,

दुयी रोज़ि नु कुनि कालो वे ।

ग्वरु शबद यिमुयो पतु नन्दुलालो ॥

भय हर बालु गोपालो वे ॥० ॥

नय छुख आकाशु नय पातालो,

नय छुख जंगलन तु बालो वे ।

वनि छुख नु यिवान ऑसिथ नॉली नालो ॥

भय हर बालु गोपालो वे ॥० ॥

मनु सर कुय बन राजु मुरारो,
 'भास्करु' सुंद छुय च़ेय सालो वे ।
 रछतम संकटु येमि कलि कालो ॥
 भय हर बालु गोपालो वे ॥०॥



गोपालु गोकुलो

गोपालु गोकुलो, वलु रास आस गिन्दौनी,
 मोहन हांचलो, काचु जून ज़न छि गलौनी ।
 श्रावुन तोतु कल्यो, व्वलु रास आस गिन्दौनी ॥
 न्यरभय निष्कलो, कलि कल छम मे गनौनी ।
 कलि वुज़ि शैशकलो, वलु रास आस गिन्दौनी ॥
 शांकलु वांकलो, लोलु हाँकल नु छेनौनी ।
 बोंबरुनि गांगलो, वलु रास आस गिन्दौनी ॥
 इन्द्रो मन फवलो, गोविंदु गीत ग्वन्दौनी ।
 बंदनु म्वकलो, वलु रास आस गिन्दौनी ॥
 ग्वालु बालु खेलो, वेंछ्य गाँव ह्यथ प्रारौनी ।
 जसुदायि मायि वलो, वलु रास आस गिन्दौनी ॥
 आयि जिगरस करतलो, मटि मार मा छुय खसौनी ।
 लर त्रॉविथ छुस बरतलो, वलु रास आस गिन्दौनी ॥
 थनि च़ूर डांबलो, यनु छ्यनु गोख तनु कोनु आख ।
 म्वनि लोसु व्वन्य वलो, वलु रास आस गिन्दौनी ॥

शामु कामुकि कोमलो, रुमु रुमु राम छु रमौनी ।
 म्वखतु केश केशु रोम्बुलो, वलु रास आस गिन्दौनी ॥
 दूरयु सूर मलो, दोरि दोरि फेरुवौनी ।
 सनु गोम यिनु चानि बलो, वलु रास आस गिन्दौनी ॥
 वथुरय म्वानि मंजलो, व्यास नारुद छु तोतौनी ।
 'सास भास्कर' प्रजलो, वलु रास आस गिन्दौनी ॥



वेरि तॅम्य सुंजि शेरि प्रान संदोरुम

वेरि तॅम्य सुंजि शेरि प्रान संदोरुम ।
 द्यान हय दोरुम कृष्ण द्यान हय दोरुम ॥
 नाजनीन पानस सिंगार पोरुम,
 परमु आकाश म्योन माल्युन ।
 मुह गटि सु प्रकाश गटि गाश होरुम ॥
 द्यान हय दोरुम कृष्ण द्यान हय दोरुम ॥० ॥
 सुबह शामु प्रभातु नोन मै व्यचोरुम,
 रुमु रुमु चोरुम खोरुम पन ।
 ओम परु नोवुम मुह मद मोरुम ॥
 द्यान हय दोरुम कृष्ण द्यान हय दोरुम ॥० ॥
 जीरु बम तारि नादु ब्यंद स्वर खोरुम,
 दशु नादु मुरली वाद प्रखट्याव ।
 राधा कृष्ण कृष्ण वाद उश्चोरुम ॥
 द्यान हय दोरुम कृष्ण द्यान हय दोरुम ॥० ॥

दर्द नयि ओश ज़ालि ज़ालि होरुम,

सथ पर्द चॅटिथुय हूर वनुवान ।

अनुग्रेह सागर आगरु फ्योरुम ॥

द्यान हय दोरुम कृष्ण द्यान हय दोरुम ॥०॥

दिह अभिमान मुह ग्यव ज़न कोरुम,

अहंकार ज़ोलुम रत्न दीप ।

ग्वडु मानसरु वरु हम हमसु दोरुम ॥

द्यान हय दोरुम कृष्ण द्यान हय दोरुम ॥०॥

सतचे अथुवासु रास खेलु नोवुम,

‘सास भास्कर’ खास बास वनि आम ।

अथुवासु विकासु होश व्यसु तोरुम ॥

द्यान हय दोरुम कृष्ण द्यान हय दोरुम ॥०॥



अरे कन्हैया तू वस्त्र दे हमारे

अरे कन्हैया तू वस्त्र दे हमारे ।

श्री शामा प्रभु प्रीतम प्यारे ॥

चिदानंदा सदा श्री गोविंदा, मकुंदा बाल कृष्णा नाद बिंदा ।

नित्यानंदा ज़गत कारण मुरारे, श्री शामा प्रभु प्रीतम प्यारे ॥

हुआ अर्पन तेरे चरनों में तनमन, ज़गत में कुछ नहीं देखता हूँ तुझ बिन ।

कुटुंब घर बार पति सारे के सारे, श्री शामा प्रभु प्रीतम प्यारे ॥

वृत्ति जैसी सती स्थिति पति बिन, रत्ती भर हैं नहीं गति प्रतिक्षण ।
 सुमत उन्मत्त तेरे दर्शन बिखारे, श्री शामा प्रभु प्रीतम प्यारे ॥
 शरीर और प्राण इंद्रिय जो तनमय, बहे अंतर निरंतर साखी चिन्मय ।
 नहीं तुझ बिन कोई दर्शन हमारे, श्री शामा प्रभु प्रीतम प्यारे ॥
 रेश्म अरमान केशान डेशिहोन जाथ, छि वुठ फेशान अँछव दिन तु बेयि रात ।
 छि तोशान गूपिय रोशान द्राये, श्री शामा प्रभु प्रीतम प्यारे ॥
 जगत बीज शांत तेरा है विस्तार, त्रिकूटि 'भास्कर' खास दीप्ति आकार ।
 अँग्न, बिजली, सूर्य, चंद्रम तारे, श्री शामा प्रभु प्रीतम प्यारे ॥



स्वरु सामु सुबह शामु शामु रूपु सुय

स्वरु सामु सुबह शामु शामु रूपु सुय ।

लागोस दसतु दसतय पंपोश ॥

नाद लोय राधायि बालु कृष्णस तय,

यनु चुय छ्यनु गोख तनु कोनु आख ।

प्रारान सूर गोम बालु पानस तय ॥

लागोस दसतु दसतु पंपोश ॥०॥

जीरु बम सुय नाद खोत अर्शस तय,

फ़रशु सान चराचर लोल बरनु आव ।

सुय लोल बाँगरनु आव जगतसतय ॥

लागोस दसतु दसतु पंपोश ॥०॥

“भागवत”

भास्कर प्रकाश

ग्रख दिच लोलन तथ कुनिरसतय,
कैहन मंज्र क्याहताम गव नमूदार ।
रंगु रंगु फ्वलिथ आव सु पूरन बरजसतय ॥
लागोस दसतु दसतु पंपोश ॥० ॥

अँग्नस तु पवनस गगनु मण्डलस तय,
बुतराँच आबशार पोश्य तु जानवार ।
राधा कृष्ण कृष्ण अजपा जपसतय ॥
लागोस दसतु दसतु पंपोश ॥० ॥

लोलु आलव द्युतुन उधवसतय,
हा उधव गछ टुकन ब्रजु मंडलस ।
तिहिंदि प्रेम छुस गोमुत मसतानु मसतय ॥
लागोस दसतु दसतु पंपोश ॥० ॥

भक्ति तिहुंज वाँच आकाशसतय,
तमि लोलु शोलान नब तु बुतरात ।
बोलान कृष्ण-कृष्ण शिवु गाशसतय ॥
लागोस दसतु दसतु पंपोश ॥० ॥

ती बूजिथ उधव वोत मंज्र गोकुलस तय,
वैछ्य तु गाँव गूपी रूस्य जानुवार ।
बुल तु गुलजार निशि आयि तसतय ॥
लागोस दसतु दसतु पंपोश ॥० ॥

चराचर दाँह देशायि साँपनिथ मसतय,
शुनि मंज्र बोलान विनुहुक नाद ।
पर तु पान मँशरिथ जपान कृष्णसतय ॥
लागोस दसतु दसतु पंपोश ॥० ॥

मोर चातक पोशनूल नचनस मसतय,
कोह तु वन बेयि नँदी ह्यथ सब्जार ।
अजपा सुय बोल कुकिलि नादसतय ॥
लागोस दसतु दसतु पंपोश ॥० ॥

यी डींशिथ उधव गव मंज्र दानसतय,
यूग ज्ञानु दान मोठुस तति लय गव ।
शुन्य गोस निनु आव वनि क्या कसतय ॥
लागोस दसतु दसतु पंपोश ॥० ॥

सुय रास चुरास लख एक रसतय,
'सास भास्कर' तति नोन चमकान ।
हावसु तमि बु ति तथ ज़ागस तय ॥
लागोस दसतु दसतु पंपोश ॥० ॥



अष्ट ब्वज़ु नारायनु कष्ट कर सॉ दूर

अष्ट ब्वज़ु नारायनु कष्ट कर सॉ दूर ।
छँनथ रोनि मंज्रलिस करय गूर गूर ॥

ध्रुव सुंदि पॉठ्यन दितम वर्दान,
शुक दीवन्य पॉठ्य प्रावु निर्वान ।
शक्ति पातु अनुग्रेह करुम पूरि पूर ॥

छँनथ रोनि मंज्रलिस करय गूर गूर ॥० ॥

ऋद्धि सिद्धि प्रावु संपदा,

रूगु शूकु कास बास नोन सर्वदा ।

बूगु यूग समयूग दितम पूरि पूर ॥

छँनथ रोनि मंजलिस करय गूर गूर ॥० ॥

सतु वँहरि प्यठु च़ेय पतु पतु द्रास,

अतु गतु ज़न्मु मरुनुच हान कास ।

मतु ना च़ेय पतु वथ छम मे दूर ॥

छँनथ रोनि मंजलिस करय गूर गूर ॥० ॥

वार छुम नु नेरु फेरु हॉ मकिन,

तारकन मंज गँजमुच बु काचु ज़ून ।

च़टु सथ पर्दु छुन दस्तूर ॥

छँनथ रोनि मंजलिस करय गूर गूर ॥० ॥

सतकुय मस चाव ह्यसु के आगुरु,

ग्रख लागि गागुरु सागरस तान्य ।

ह्यसु सान तमि मसुबनु मखमूर ॥

छँनथ रोनि मंजलिस करय गूर गूर ॥० ॥

प्रेमु मस खॉस्य बँरिम बरबुकु आस,

पास कर पनुन्यन टाठ्यन हुंद ।

द्रुय चॉन्य छम हा वसि गोम सूर ॥

छँनथ रोनि मंजलिस करय गूर गूर ॥० ॥

लोलुचि रगि सग फेरि हैरि ब्वन,

दर्दुचि दगि पय फेरि क्षन क्षन ।

तमि सेह रेह छु दज़ान कोहितूर ॥

छँनथ रोनि मंजलिस करय गूर गूर ॥० ॥

पुष्कर नाथु होश दिम गोश थाव,
 कँज चानि फिर्य फिर्य हँज गँयम कौर।
 म्वनि लोसु व्वन्य मसॉ ह्यम दूर दूर॥

छँनथ रोनि मंजलिस करय गूर गूर॥०॥

अथु वासु रोटुम चोन दामन
 'सास भास्करु' कास मुंह अंधकार।
 गथ दिम पथ रछुम नतु मलु सूर॥

छँनथ रोनि मंजलिस करय गूर गूर॥०॥



परात्पर परमु शिवी

परात्पर परमु शिवी।
 जय दीवी दीवी॥

न्यर द्वँदी बिंदी,
 नादु बिंद मद्य सेंदी,

जय जगत आनन्दी।
 जय दीवी दीवी॥

पथ रछतम वरतम,
 प्रेम आनन्द बरतम,

सत् भावु सथ करतम।
 जय दीवी दीवी॥

तीजु मय आकारसुय,
 शरण तथ आधारसुय,

बीजुमय ओमकारसुय।
 जय दीवी दीवी॥

सुरासुर न्यथ छि स्वर्नस,
गनधर्व वीद परनस,

कारण गथ करनस ।
जय दीवी दीवी ।।

अष्ट सिद्ध नव निद्ध बास,
द्वष्ट नष्ट कर सपष्ट बास,

यष्ट दातरी कष्ट कास ।
जय दीवी दीवी ।।

ऐं बीज कल्लीं बीजी,
श्रीं शक्ति न्यरु बीजी,

शाँत ईकांत तीजी ।
जय दीवी दीवी ।।

स्वख प्रकाश उदय,
इन्दुरव बनि ईकुमय,

दशमु द्वार मध उद्य ।
जय दीवी दीवी ।।

उर्धु नादु बनि उत्पत,
शुद्ध शिव बनि प्रापत,

प्रसादु चानि बानु वत ।
जय दीवी दीवी ।।

धर्मु अर्थु मोक्ष कामुय,
पूर्णस छु निष्कामुय,

दिव वॅन्य चु परमु धामय ।
जय दीवी दीवी ।।

बालक वत भाषा,
मूह गटि हाव गाशा,

बोज़तम छम आशा ।
जय दीवी दीवी ।।

चॉन्य दया ज़ीवन,
मनु वाँछित दीवन,

तवय कारण छि सीवन ।
जय दीवी दीवी ।।

‘सास भास्कर’ छु प्रज़लान,
हरशि गण नित्य निर्वान,

च्यथ विमर्शु दीप्तिमान ।
जय दीवी दीवी ।।

बाह रव गाह चोन माह पैक्करिये

बाह रव गाह चोन माह पैक्करिये ।

ना जुच थॅर शाह स्वंदॅरिये ॥

नाज़नीन पानस साज़ कॅम्य कॅरिये,

नाँज़ुल्य जादू गॅरिये लो ।

ब्रमराँव्य अँम्य चाँन्य सेहरु सामरिये ॥

ना जुच थॅर शाह स्वंदॅरिये ॥०॥

रवनि गोड श्रोनिदार चूनि जॅर्य जॅरिये,

शिनि मंज़ु बोलान बिनाहुक नाद ।

पॅरिमुत्य जॅर्य गॅयि अनपर पॅरिये ॥

ना जुच थॅर शाह स्वंदॅरिये ॥०॥

असमानु वॅछखय सोन्य कोतुरिये,

कमि बाज़ुरिये त्रॉवथ रव ।

शाह पर लूसिम मान कॅर्य कॅरिये ॥

ना जुच थॅर शाह स्वंदॅरिये ॥०॥

हूरन सूर गव चानि दूर्युरये,

नूर बॅर्य बॅरिये तिम छि वनुवान ।

अरमान ख्यथ रोज़ु स्वर्गुचि पॅरिये ॥

ना जुच थॅर शाह स्वंदॅरिये ॥०॥

मूरि मूरि फोजुखय मुश्क अंबॅरिये,
रस मसु दूरय चॉन्यै बॅरिये कॅम्य।
दूर चॉन्य दूह तु राथ कॅम्य अँलुरिये ॥
ना ज़ुच थॅर शाह स्वंदॅरिये ॥०॥

कमि आलि द्रायख हा रंगु जॅरिये, -
पौरयै कुकिल्यव गोविंदु गू।
स्वनुहॉरय पखु चानि म्वखतु जर्य जॅरिये ॥
ना ज़ुच थॅर शाह स्वंदॅरिये ॥०॥

रुमु रुमु जुलफुक्य यिम वालु बॅरिये,
दुखालु दानु बांबॅरिये लो।
ज़ालु लॅग्य राज़ु हंस प्यठ शेशदॅरिये ॥
ना ज़ुच थॅर शाह स्वंदॅरिये ॥०॥

अंबर हारान नेरख पमबुसॅरिये,
रंबुवन्य कॅम्य गम बॅरिये लो।
बौबरुन गोसु मा गोय च़े लो-लॅरिये ॥
ना ज़ुच थॅर शाह स्वंदॅरिये ॥०॥

शुराह सिंगार चॉन्य पुरजॅरिये,
गॅरिये कॅम्य ज़रगॅरिये लो।
कछ़कर दसवानु स्वनु ग्वडु कॅरिये ॥
ना ज़ुच थॅर शाह स्वंदॅरिये ॥०॥

आगरु प्यठुची बागु बबॅरिये,
नौग्यरायिन्य समन बॅरिये लो।

छॉगिस मय ज़ाग व्वन्य चु नागॅरिये ॥

ना ज़ुच थॅर शाह स्वंदॅरिये ॥० ॥

प्यालु चाव माला माल बर्य बॅरिये,

साकिया युथ नु बाक्री रोज़ि ग्राव ।

‘भास्करु’ सास भास न्यबरु अँदुरिये ॥

ना ज़ुच थॅर शाह स्वंदॅरिये ॥० ॥



ज़गथ बीज़ चॅकर शोडश डल

ज़गथ बीज़ चॅकर शोडश डल, रमान नित्य चॅकरु पीठस तल ।

नमान कारण परान मंगल, उमा देवी क्षमा वत्सल ॥

मंगलदा सर्व मंगॉली ॥

प्यमोय पादन तु थवी लादन, क्षमा कर सान्यन अपराधन,

चु कन दार वारु फॅरियादन, अबल बुल बालुनुय नादन ।

तवय त्रॉविथ छि लर बर तल, मंगलदा सर्व मंगॉली ॥

संनातन धर्मुची रछ लाज, नवन पीठन कुनुय सामराज,

चु स्यद कर पानु छख सरताज, छि त्रनवय लूक त्रेय मोहताज ।

महाराज आदि राज श्री फल, मंगलदा सर्व मंगॉली ॥

चु रयन, रूग, भयि, शूक दूर कर, पनुन अनुग्रेह चु बरपूर कर,
चु कूध काम विषयन सूर कर, चु भोग योग ग्यान मंजूर कर।
चु समयोगु संपदा दितु अटल, मंगलदा सर्व मंगॉली ॥

तुहे माता पिता दाता, तुहे भ्राता जगत माता,
तुहे भक्तयन ति वरदाता, तुहे दुष्टन सदा गाथा।
चु नैन्य भास कास सर्व ग्रेह बल, मंगलदा सर्व मंगॉली ॥

यि माया मुह करतम चु दूर, चलयम अज्ञान फवल्यम युथ नूर,
गलन काम क्रोध दुर्जन चूर, पनुन अनुग्रेह चु कर भर पूर।
तवय द्यन राथ छम चॉनी कल, मंगलदा सर्व मंगॉली ॥

फवल्यम अदु हृदयिकुय कमल, चलयम अज्ञानुची गांगल,
दज्यम काम क्रोध मुह जंगल, वुज्यम शेखर कला शेशकल।
वज्ञान नादु ब्यंद तार न्यश्चल, मंगलदा सर्व मंगॉली ॥

भेद्रकॉली व्वजॉली नेर, सतुच तलवार ह्यथ वारुफेर,
छि कर फुरसथ मु कर व्वन्य चेर, अन्याय छठ छाय कास अंधेर।
चु भास 'सास भास्कर' न्यरमल, मंगलदा सर्व मंगॉली ॥



जगत बीजू तीजू परि पूरन

जगत बीजू तीजू परि पूरन ।

कैरिथ छख व्याप्त चुंय हैरि ब्वन ।।

नमामे चरनु कमलन द्वन, क्षमा कर हे उमा देवी ।।
 परात्पर पर अपर विसतार, त्रे कारन रूप छु बासान सार ।
 दयाये चानि व्यनु दुस्तार, क्षमा कर हे उमा देवी ।।
 ऋणन शूकन भयन रूगन, क्षनन मंज छख करान मूचन ।
 दिवान भोगन तु बेयि योगन, क्षमा कर हे उमा देवी ।।
 कटाक्षा योद गछख कैरिथुय, दयाये चानि गछु तैरिथुय ।
 नेथुर छिम लोलु अशि बैरिथुय, क्षमा कर हे उमा देवी ।।
 पनुन प्रन करतु व्वन्य चुंय याद, दिवान शुर लोलु हँत्य छुय नाद ।
 चे रोस कुस बोझि सोन फेर्ययाद, क्षमा कर हे उमा देवी ।।
 करान सृष्ट थ्यथ तु बेयि समहार, त्रेकारण पानु छख आधार ।
 छु चाने आगिन्या अनुसार, क्षमा कर हे उमा देवी ।।
 तू हे माता पिता भ्राता, गुरु बन्धो तु बेयि दाता ।
 शुर्यन कुस असि चे विन माता, क्षमा कर हे उमा देवी ।।
 बरस तल अँस्य गँडिथ छी कर, अबल बालक छि त्रॉविथ लर ।
 छे मा आश काँसि हुंज चुंय वर, क्षमा कर हे उमा देवी ।।
 मे दिम ज्यव गीत ग्यवय चाँनी, नतय ह्येकि क्या वँनिथ वाँनी ।
 करान वीद चोर त्वता चाँनी, क्षमा कर हे उमा देवी ।।
 चु पानय पानु छख ज्ञानान, पनुन महिमा कुस करि मान ।

ब्रह्मादिक दीव छि तति व्यसुरान, क्षमा कर हे उमा देवी ।।
 यि माया मुह करतम दूर, चलान अंधकार फवलान आसि नूर ।
 बन्यम साक्षात्कार बरपूर, क्षमा कर हे उमा देवी ।।
 यि गटु छटु छांय व्वन्य कासतम, प्रेत्यक्ष 'सास भास्कर' बासतम ।
 सदा सतु किन्य प्रसन्न आसतम, क्षमा कर हे उमा देवी ।।



श्री राज्ञन्या ख्यमाकार

भक्तानु ग्रह कारिनी शक्ति त्रेलोक धारिनी ।
 राज्यरेन्य रानि ब्रौरी, श्री राज्ञन्या क्षमाकार ।।

चमकन कूटि रवय, चित गगन त्राव प्रवय ।
 अनुहत शिव शिवय, बोलुवुन छु बूद ओमकार ।।
 द्वादशारकु तीजु आकार, मुकटु सोलह सिंगार ।
 हटि त्रोट्य तु मालु शाहमार, सिंहासनस तु सवार ।।

श्री राज्ञन्या क्षमाकार ।।

चित रूपु तीजु समवित, स्यदु रूपु बीज असतित ।
 आनन्दु स्यंदु विकसित, प्रखचार यि चोन सोफार ।।

श्री राज्ञन्या क्षमाकार ।।

हीम बीज कलीम बीजी, सौ बीज शांत तीजी ।
 राम राजा अंबीजी, स्वाहा सदा नमसकार ।।

श्री राज्ञन्या क्षमाकार ।।

भक्तयन रँछिथ पथ नित्य, शक्ति त्रैलोक्य अस्तित ।
दुर्गी निवार दुर्गत, दीर्घ रोग व्वन्य च निवार ॥

श्री राज्ञन्या क्षमाकार ॥

प्वन्य पाप कर्म लोनुय, रुत लेख छल च प्रोनुय ।
मटि न्याय छुय च सोनुय, नोन हाव व्वन्य च प्रखचार ॥

श्री राज्ञन्या क्षमाकार ॥

ओमकार वीद गोनुथ, त्रैय बीद अँबीद च मोनुथ ।
क्या माने तथ च जोनुथ, जाननस कर छु तकरार ॥

श्री राज्ञन्या क्षमाकार ॥

निश दिन शरण त्रैकारन, शेष्य दर लँगिथ छि प्रारण ।
रेश केशवुन्य व्यचारन, प्रारान छि न्यन्द्रि बेदार ॥

श्री राज्ञन्या क्षमाकार ॥

काम क्रूध लूभ दुर्जन, गाल पाल व्वन्य च स्वरजन ।
पर्वत कॉल्य लरजन, दीह कुय क्या छु आधार ॥

श्री राज्ञन्या क्षमाकार ॥

चॉनी दया भवॉनी, हेकि क्या वँनिथ यि वॉनी ।
अँजराव न्याय सॉनी, गँजराव छि चॉन्य शीरखार ॥

श्री राज्ञन्या क्षमाकार ॥

नाना रूप दॉरिथ, ऑरुत्य च सॉर्य तॉरिथ ।
व्वन्य वॉर्य सॉन्य छि ऑर्त्य, तॉर क्या च दार अवतार ॥

श्री राज्ञन्या क्षमाकार ॥

गौरी अघूर द्वख कास, ग्वरु म्वखु संनम्वखु बास ।
हर म्वखु छारुवुन दास, 'सास भास्कर' चमत्कार ॥

श्री राज्ञन्या क्षमाकार ॥

ललुवान सीरि हक ज़ेरि ज़ेरि हेरि ब्वन

ललुवान सीरि हक ज़ेरि ज़ेरि हेरि ब्वन, छम वज़ान ज़ीरु बम तार ।
ह्यसके मैखानु मस येलि बु चोवनस बोवनम सीरि असरार ।

आलव तोरय गोख दॅरययाव दामु चोख, शोकन कोरुख मिलुच्चार ।
सतवय आकाश सतवय पाताल तलु प्यठ दिथ कुनुय ठान ।

गाह गटु गाह गाश गाह प्रकाश नूरान यकसान सोरि सामान ।
रंगु रंगु बेरंग सूरथ स्व मूरथ नॅन्य द्रायि दरबाज़ार ।

गगुनय पवुनय लागुनय बागुनय सथ नयि बैयि नव द्वार ।
सुय हज़ार दास्तान बोलान नयि नयि म्वलुवान ह्यथ खॅरीदार ।

पनुनुय ह्योन द्योन पनुनुय बाज़ार पानय ग्राख बैयि सोदागार ।
हर्दु सोंतु कुनिरस वोंत कुनि लोबमस नु दर्दु नयि फेरि शोहजार ।

सथ पर्दु चॅट्यथुय हूर द्रायि वनुवान पोशन कोरुख तूमार ।
ग्रख लॅज सोदरस दरवाज़ खुलु गॅय अनुग्रेह दितुख अंबार ।

कंदा पोरय ज़ूनि डबि शेष्य तु रव सॉविथ नॉविथ अँद्रमि तौंदरय प्रान ।
गटि मंज़ भास्कर' सास भासुनॉविथ शिवु गाशु कीशव सुय शांत आकार ।




1874-1875 - 1876-1877

1877-1878 - 1879-1880

ललुवान सीरि हक ज़ेरि ज़ेरि हेरि ब्वन,
छम वज़ान ज़ीरु बम तार।
ह्यसके मैखानु मस येलि बु चोवनस
बोवनम सीरि असरार।

आलव तोरय गोख देंग्याव दामु चोख,
शोकन कोरुख मिलुन्नार।
सतवय आकाश सतवय पाताल
तलु प्यठ दिथ कुनुय ठान।



परमपुज्य स्वामी आफ़ताब जी महाराज
कारिहामा-कुपवारा, कश्मीर
3 अगस्त 1883 ई० - 28 जनवरी 1960 ई०